


宋史



本紀卷第二十三

宋史二十三

開府儀同三司上柱國錄軍國重事前中書右丞相監國史領選事都總裁臬脫奉  
勅修

欽宗

欽宗恭文順德仁孝皇帝諱桓徽宗皇帝長子母曰  
恭顯皇后王氏元符三年四月巳酉生于坤寧殿初  
名亶封韓國公明年六月進封京兆郡王崇寧三年  
二月甲午更名焯十一月丁亥又改今名大觀二年  
正月進封定王政和元年三月講學于資善堂二年  
正月加太保四年二月癸酉冠于文德殿五年二月

乙巳立爲皇太子大赦天下丁巳謁太廟詔乘金輅  
設鹵簿如至道天禧故事及宮僚參謁並稱臣皆辭  
之六年六月癸未納妃朱氏宣和七年十二月戊午  
除開封牧庚申徽宗詔皇太子嗣位自稱曰道君皇  
帝趣太子入禁中被以御服泣涕固辭因得疾又固  
辭不許辛酉即皇帝位御垂拱殿見羣臣是日日有  
五色暈挾赤黃珥重日相蕩摩久之乃引道君皇帝  
出居龍德宮皇帝出居擷景園以少宰李邦彥爲龍  
德宮使太保領樞密院事蔡攸門下侍郎吳敏副之  
是時金人已分道犯境壬戌赦大逆反叛以下罪進

百官秩一等賞諸軍立紀朱氏爲皇后以太子詹事  
耿南仲簽書樞密院事癸亥詔太傅燕王越王入朝  
不趨贊拜不名詔非三省樞密院所得旨有司勿行  
甲子幹離不陷信德府粘罕圍太原詔京東淮西浙  
募兵入衛太學生陳東等上書數蔡京童貫王黼梁  
師成李彥朱勔罪謂之六賊請誅之丙寅上道君皇  
帝尊號曰教主道君太上皇帝皇后曰道君太上皇  
后詔改元

靖康元年春正月丁卯朔受群臣朝賀退詣龍德宮  
賀道君皇帝詔中外臣願實封言得失金人破相州

戊辰破濬州威武軍節度使梁方平師實河北河東路制置副使何灌退保滑州己巳范奔還金人濟河詔親征道君皇帝東巡以領樞密院事蔡攸爲行宮使尚書左丞宇文粹中副之詔自今除授黜陟及恩數等事並參酌祖宗舊制罷內外官司蜀所一百五處止留後苑以奉龍德宮以門下侍郎吳敏知樞密院事吏部尚書李稅同知樞密院事貶太傅致仕王黼爲崇信軍節度副使安置求州賜翊衛大夫安德軍承宣使李彥死並籍其家放寧遠軍節度使米勗歸田里帝欲親征以李綱爲留守以李稅爲副給事

中王寓諫親征罷之庚午道君皇帝如亳州百官多潛遁宰相欲奉帝出襄鄧李綱諫止之以綱爲尚書右丞辛未以李綱爲親征行營使侍衛親軍馬軍都指揮使曹瑑副之太宰兼門下侍郎白時中罷李邦彥爲太宰兼門下侍郎守中書侍郎張邦昌爲少宰兼中書侍郎尚書左丞趙野爲門下侍郎翰林學士承旨王孝迪爲中書侍郎同知樞密院事蔡懋爲尚書左丞壬申金人渡河遣使督諸道兵入授癸酉詔兩省樞密院官制一遵元豐故事金人犯京師命尚書駕部員外郎鄭望之親衛大夫康州防禦使高世

則使其軍詔從官舉文武臣僚堪充將帥有膽勇者  
是夜金人政宣澤門李綱禦之斬獲百餘人至旦始  
退甲戌金人遣吳孝民來議和命李稅使金軍金人  
又使蕭三寶奴耶律忠張愿恭來以吏部尚書唐恪  
同知樞密院事乙亥金人攻通津景陽等門李綱督  
戰自卯至酉斬首數千級何灌戰死李稅與蕭三寶  
从耶律忠王汭來索金帛數千萬且求割太原中山  
河間三鎮并宰相親王爲質乃退師丙子避正殿減  
常膳括借金銀籍倡優家財庚辰命張邦昌副康王  
捷使金軍詔稱金國加大字辛巳道君皇帝幸鎮沮

以兵部尚書路允迪簽書樞密院事金人陷陽武知  
縣事蔣興祖死之壬午大風走石竟日乃止封子諶  
爲大寧郡王甲申省廉訪使者官罷鈔旁定貼錢及  
諸州免行錢以諸路贍學戶絕田產歸常平司統制  
官馬忠以京西募兵至擊金人于順天門外敗之乙  
酉路允迪使黏罕軍于河東平陽府將劉嗣初以城  
叛丁亥靖難軍節度使河北河東路制置使种師道  
督涇原秦鳳兵入援以師道同知樞密院事爲京畿  
河北河東宣撫使統四方勒王兵及前後軍庚寅盜  
殺王黼于雍丘癸巳大霧四塞乙未貶少保淮南節

度使梁師成爲彰化軍節度副使行及八角鎮賜死  
二月丁酉朔命都總制姚平仲將兵夜襲金人軍不  
克而奔戊戌罷李綱以謝金人廢親征行營司金人  
復來議和庚子命駙馬都尉曹晟使金軍辛丑又命  
資政殿大學士宇文虛中知東上閣門事王侁使之  
許割三鎮地太學諸生陳東等及都民數萬人伏闕  
上書請復用李綱及种師道且言李邦彥等疾綱恐  
其成功罷綱正墮金人之計會邦彥入朝衆數其罪  
而罵吳敏傳宣衆不退遂搗登聞鼓山呼動地殿帥  
王宗漣恐生變奏上勉從之遣耿南仲號於仲曰已

得旨宣綱矣內侍朱拱之宣綱後期衆鬪而磔之并  
殺內侍數十人乃復綱右丞充京城防禦使壬寅追  
封范仲淹魏國公贈司馬光太師張商英太保除元  
祐黨籍學術之禁詔誅士民殺內侍爲有者禁伏聞  
上書廢苑囿宮觀可以與民者金人使王汭來癸卯  
命肅王樞使金軍以觀文殿學士大名尹徐處仁爲  
中書侍郎宇文虛中簽書樞密院事蔡懋罷乙巳字  
文虛中王球復使金軍康王至自金軍金人邊韓貴  
裔來告辭遂退師京師解嚴丙午康王構爲太傅靜  
江奉寧軍節度使省明堂班朔布政官丁未日有爾

宋史本紀卷三十三  
五  
珥戍申赦天下詔諭士民自今庶事並遵用祖宗舊制凡蠹國害民之事一切寢罷已酉罷宰執兼神霄玉清萬壽宮使及殿中監符寶郎詔用祖宗故事擇武臣得軍心者爲同知簽書樞密院邊將有成望者爲三衙以金人請和詔官民昔嘗附金而復歸本朝者各還其鄉國庚戌季邦彥罷以張邦昌爲太宰兼門下侍郎吳敏爲少宰兼中書侍郎李綱知樞密院事耿南仲爲尚書左丞李稅爲尚書右丞辛亥詔監察御史言事如祖宗法宇文粹中罷知江寧府癸丑种師道罷爲中太一宮使贈右正言陳瓘爲右諫議

大夫甲寅貶太師致仕蔡京爲秘書監分司南京太師廣陽郡王童貫爲左衛上將軍太保領樞密院事蔡攸爲太中大夫提舉亳州明道宮先是粘罕遣人來求賂大臣以勤王兵大集拘其使人且結約余觀以圖之至是粘罕怒及攻太原不克分兵趣京師過南北關權威勝軍李植以城降乙卯陷隆德府知府張確通判趙伯臻司錄張彥適死之丙辰有二流星一出張宿入濁没一出北河入軫己未詔遙郡承宣使有功應除正任者自今除正任刺史辛酉梁方平坐棄河津伏誅王孝迪罷命給事中王雲侍衛親軍

宋史本紀卷三十三  
六  
馬軍都指揮使曹瑒使金國鎮洮軍節度使中太乙  
宮使种師道爲河南河東路宣諭使保靜軍節度使  
前副都指揮使姚古爲制置使乙丑御殿復膳丙寅  
下哀痛之詔于陝西河東是月金人犯澤州之高平  
知州高世由往犒之乃去三月丁卯朔遣徽獻閣待  
制宋煥奉表道君皇帝行宮詔侍從言事詔非三省  
樞密院所奉旨諸司不許奉行罷川路歲所遣使募  
人掩軍民遺骸遣使分就四郊致祭戊辰李稅罷爲  
鴻慶宮使己巳張邦昌罷爲中太宮使徐處仁爲太  
宰兼門下侍郎唐恪爲中書侍郎翰林學士何臬爲

尚書右丞御史中丞許翰同知樞密院事庚午宇文  
虛中罷知青州癸酉詣景靈東宮行恭謝禮命趙野  
爲道君皇帝行宮奉迎使甲戌恭謝景靈西宮及建  
隆觀乙亥詣陽德觀凝祥池中太一宮佑神觀相國  
寺丙子改擷景園爲寧德宮錄司馬光後己卯燕王  
僕越王偲爲太師壬午詔金人叛盟深入其元主和  
議李邦彥奉使許地李稅李鄴鄭望之悉行罷黜又  
詔种師道姚古种師中往援三鎮保塞陵寢所在誓  
當固守癸未遣李綱迎道君皇帝于南京以徐處仁  
爲禮儀使殿中侍御史李擢左司諫李會罷乙酉迎



道君皇帝于宜春苑太后入居寧德宮丙戌知中山府詹度爲資政殿大學士知太原府張孝純知河間府陳邁並爲資政殿學士知澤州高世由直龍圖閣賞城守之勞也丁亥朝于寧德宮詔扈從行宮官吏候還京日優加賞典除有罪之人迫於公議已行遣外餘令臺諫勿復用前事糾言庚寅肅王樞爲太傅姚古復隆德府辛卯復威勝軍壬辰太保景王杞濟王栩爲太傅有流星出紫微垣甲午康王構爲集慶建雄軍節度使尚書戶部侍郎錢蓋爲陝西制置使命陳東初品官賜同進士出身辭不拜籍朱勔家乙

未詔金歸朝官民未發遣者止之丙申貶蔡京爲崇信軍節度副使是春夏人取天德雲內武州及河東八館夏四月戊戌夏人陷鎮武城攝知城事朱昭死之己亥迎太上皇帝入都門壬寅朝于龍德宮癸卯立子諶爲皇太子耿南仲爲門下侍郎乙巳置春秋博士戊申置詳議司于尚書省討論祖宗法己酉乾龍節群臣上壽于紫宸殿庚戌趙野罷壬子金人使賈寔舟企弓來癸丑封太師沂國公鄭紳爲樂平郡王貶童貫爲昭化軍節度副使安置郴州減宰執俸給三之一及支賜之半詔開經筵令吏部稽考庶官

凡由楊戩李彥之公田王黼朱勔之應奉童貫西北之師孟昌齡河防之役夔蜀湖南之開疆關陝河東之改幣及近習所引獻頌可采特赴殿試之流所得爵賞悉奪之甲寅种師道加太尉同知樞密院事河北河東路宣撫使乙卯詔自今假日特坐百司毋得休務以平涼軍節度使范訥爲右金吾衛上將軍丙辰詔有告姦人妄言金人復至以恐動居民者賞之戊午進封南康郡王棻爲和王平陽郡王榛爲信王己未復以詩賦取士禁用莊老及王安石字說壬戌詔親擢臺諫官宰執勿得薦舉著爲令追政和以來

道官處士先生封贈奏補等敕書甲子令在京監察御史在外監司郡守及路分鈐轄已上舉曾經邊任或有武勇可以統衆出戰者人二員東兵正將占沆與金人戰于交城縣死之乙丑詔三衙並諸路帥司名舉諳練邊事智勇過人并豪俊奇傑衆所推服堪充統制將領者各五人貶蔡攸節度副使安置朱勔于循州五月丙寅朔朝于龍德宮令提舉官日具太上皇帝起居平安以聞丁卯詔天下有能以財穀佐軍者有司以名聞推恩有差以少傅鎮西軍節度金深爲特進觀文殿太學士戊辰罷王安石配饗孔子

廟庭庚午少傅安武軍節度使錢景臻鎮安軍節度使開府儀同三司劉宗元並爲左金吾衛上將軍保信軍節度使劉敷武成軍節度使劉敏獨德軍節度使張楸岳陽軍節度使王彛臣應道軍節度使朱孝孫瀘川軍節度使錢忱並爲右金吾衛上將軍是日寒辛未申銅禁詔無出身待制已上年及三十而通歷任實及十年者乃得任子監察御史余應求坐言事迎合大臣罷知衛州甲戌曲赦河北路乙亥申銷金禁丁丑詔以儉約先天下澄冗汰貪爲民險害授監司郡縣奉行所未及者凡十有六事姚古將兵至

威勝開粘罕將至衆驚潰河東大振河北河東路制置副使种師中與金人戰于榆次死之已卯借外任官職田一年開府儀同三司高侏卒辛巳損太宮日進膳追削高侏官甲申罷詳議司已丑以河東經略安撫使張孝純爲檢校少保武當軍節度使壬辰詔天下舉習武藝兵書者乙未詔姚古援太原六月丙申朔以道君皇帝還朝御紫宸殿受羣臣朝賀詔諫官極論國失戊戌令中外舉文武官才堪將帥者時太原圍急羣臣欲割三鎮地李綱沮之乃以李綱代种師道爲宣撫使援太原辛丑以資政殿學士劉韜

爲宣撫副使陝西制置司都統制解潛爲制置副使  
太白犯歲星壬寅封鄆國公榘爲安康郡王韓國公  
捷爲廣平郡王并開府儀同三司詔今日政令惟遵  
奉上皇詔書修復祖宗故事羣臣庶士亦當講孔孟  
之正道察安石舊說之不當者羽翼朕志以濟中興  
癸卯以侍衛親軍馬軍副都指揮使鎮西軍承宣使  
王稟爲建武軍節度使錄堅守太原之功也甲辰路  
允迪罷爲醴泉觀使乙巳左司諫陳公輔以言事責  
監合州酒務壬子天狗墜地有聲如雷癸丑慮囚丙  
辰太白熒惑歲鎮四星合於張辛酉罷都水將作監

承授內侍官熙河都統制焦安節坐不法李綱斬之  
壬戌姚古坐擁兵逗遛貶爲節度副使安置廣州彗  
出紫微垣秋七月乙丑朔除元符上書邪等之禁宋  
昭政和中上書諫攻遼貶連州庚午詔赴都堂乙亥  
安置蔡京于儋川攸雷州童貫吉陽軍已卯免借河  
北河東陝西路職田乙酉詔蔡京子孫一十三人已  
分竄遠地遇赦不許量移是日京死于漳州丁亥令  
侍從官共議改修宣仁聖烈皇后謗史辛卯遣監察  
御史張澂誅童貫廣西轉運副使李昇之誅趙良嗣  
並竄其子孫于海南壬辰侍御史李光遠坐言事貶

監當是月解潛與金人戰于南關敗績劉韜自遼州引兵與金人戰敗績八月甲午朔錄陳瓘後丙申復命种師道以宣撫使巡邊召李綱還庚子詔以彗星避殿減膳令從臣具民間疾苦以聞河東察訪使張灝與金人戰于文水敗績辛丑詔求民之疾苦者十七事悉除之丁未幹離不復攻廣信軍保州不克遂犯真定戊申都統制張思正等夜襲金人于文水縣敗之己酉復戰師潰死者數萬人思正奔汾州都統制拆可求師潰于子夏山威勝隆德汾晉澤絳民皆渡河南奔州縣皆空金人乘勝攻太原錄張庭堅後

乙卯遣徽猷閣待制王雲閣門宣贊舍人馬識遠使于金國秘書著作佐郎劉岑太常博士李若水分使其軍議和戊午許翰罷知亳州己未太宰徐處仁罷知東平少宰吳敏罷知揚州以唐恪為少宰兼中書侍郎何臬為中書侍郎禮部尚書陳過庭為尚書右丞開封尹聶昌同知樞密院事御史中丞李回簽書樞密院事庚申遣王雲使金軍許以三鎮賦稅是月福州軍亂殺其知州事柳庭俊九月丙寅金人陷太原執安撫使張孝純副都總管丁稟通判方笈皆死之辛未貶吳敏為崇信軍節度副使安置涪州移蔡

宋史紀事本末卷二十三  
十一  
攸于萬安軍尋與弟脩及朱勔皆賜死乙亥詔編脩  
敕令所取靖康以前蔡京所乞御筆手詔參祖宗法  
及今所行者刪修成書丁丑禮部尚書王寓為尚書  
左丞戊寅有赤氣隨日出李綱罷知揚州壬午烏童  
貫首于都市癸未賜布衣尹焞為和靖處士甲申日  
有兩珥背氣丙戌建三京及鄧州為都總管府分總  
四道兵庚寅以知大名府趙野為北道都總管知河  
南府王襄為西道都總管知鄧州張叔夜為南道都  
總管知應天府胡直孺為東道都總管又罷李綱提  
舉洞霄宮辛卯遣給事中黃鏐由海道使金國議和

是月夏人陷西安州冬十月癸巳朔御殿復膳貶李  
綱為保靜軍節度副使安置建昌軍丁酉金人陷真  
定都鈐轄劉翀死之有流星如杯戊戌金人使楊天  
吉王訥來庚子日有青赤黃戴氣金人陷汾州知州  
張克戩兵馬都監賈亶死之又攻平定軍辛丑下哀  
痛詔命河北河東諸路帥臣傳檄所部得便宜行事  
壬寅天寧節率群臣詣龍德宮上壽甲辰詔用蔡京  
王黼童貫所薦人丙午集從官于尚書省議割三鎮  
召种師道還丁未以禮部尚書馮澥知樞密院事巳  
酉閩砲飛山營庚戌以范訥為寧武軍節度使河北

河東路宣撫使遼故將小鞠鞬攻陷麟州建寧砦知  
砦楊震死之壬子詔太常禮官集議金主尊號命尚  
書左丞王寓副康王使幹離不軍寓辭乙卯雨木冰  
丙辰金人陷平陽府又陷威勝隆德澤州丁巳高麗  
入貢令明州遞表以進遣其使還戊午貶王寓爲單  
州團練副使命馮澥代行庚申日有兩珥及背氣侍  
御史胡舜陟請援中山不省辛酉种師道薨十一月  
丙寅夏人陷懷德軍知軍事劉鈗通判杜翊世死之  
籍譚稹家戊辰康王未至金軍而還馮澥罷巳巳集  
百官議三鎮棄守庚午詔河北河東京畿清野令流

民得占官舍寺觀以居辛未有流星如杯壬申禁京  
師民以浮言相動者癸酉右諫議大夫范宗尹以首  
議棄地罷金人至河外宣撫副使折彥質領師十二  
萬拒之甲戌師潰金人濟河知河陽燕瑛西京留守  
王襄棄城遁乙亥命刑部尚書王雲副康王使幹離  
不軍許割三鎮奉袞冕車輅尊其主爲皇叔且上尊  
號丙子金人度河折彥質兵盡潰提刑許高兵潰于  
洛口金人來言欲盡得河北地京師戒嚴遣資政殿  
學士馮澥及李若水使粘罕軍丁丑何臬罷以尚書  
左丞陳過庭爲尚書侍郎兵部尚書孫傳爲尚書右

丞命成忠郎郭京領選六甲正兵所簽書樞密院事  
李回以萬騎防河衆潰而歸是日塞京城門戊寅進  
龍德宮婉容韋氏為賢妃康王構為安國安武軍節  
度使罷清野辛巳以知懷州霍安國為徽猷閣待制  
通判林淵直徽猷閣賞守禦之功也壬午幹離不使  
楊天吉王洎勃堇撒離朮來命耿南仲使幹離不軍  
聶昌使粘罕軍許畫河為界康王至磁州州人殺王  
雲止王勿行王復還相州甲申以尚書右丞孫傳同  
知樞密院事御史中丞曹輔簽書樞密院事以京兆  
府路安撫使范致虛為陝西五路宣撫使令督勤王

兵入援乙酉幹離不軍至城下遣蠟書間行出關召  
兵又約康王及河北守將來援多為邏兵所獲丁亥  
大風發屋折木李回罷戊子金人攻通津門范瓊出  
兵焚其砦己丑南道總管張叔夜將兵勤王至玉津  
園以叔夜為延康殿學士幹離不遣劉晏來庚寅幸  
東壁勞軍詔三省長官名悉依元豐舊制領開封府  
何臬為門下侍郎閏月壬辰朔金人改善利門統制  
姚仲友禦之奇兵作亂殺使臣王宗澹斬數十人乃  
定唐恪出都人欲擊之因求去罷為中太一官使以  
門下侍郎何臬為尚書左僕射兼中書侍郎劉韜坐



宋史本紀卷三十三  
十一  
棄軍降五官子祠癸巳京師苦寒用日者言借土牛  
迎春朱伯友坐棄鄭州降三官罷西道總管王襄棄  
西京去知澤州高世由以城降于金燕瑛欲棄河陽  
爲亂兵所殺河東諸郡或降或破殆盡都民殺東壁  
統制官辛亢宗罷民乘城代以保甲黏罕軍至城下  
甲午時雨雪交作帝被甲登城以御膳賜士卒易火  
飯以進人皆感激流涕金人攻通津門數百人縋城  
禦之焚其砲架五鵝車二驛召李綱爲資政殿大學  
士領開封府金人陷懷州霍安國林淵及其鈐轄張  
彭年都監趙士訥張謚皆死之乙未金人入青城攻

朝陽門馮澥與金人蕭慶楊真誥來丙申帝幸宣化  
門以障泥乘馬行泥淖中民皆感泣張叔夜數戰有  
功帝如安上門召見拜資政殿學士金人執胡直孺  
又陷棋州丁酉赤氣亘天以馮澥爲尚書左丞戊戌  
殿前副都指揮使王宗澆與金人戰于城下統制官  
高師旦死之庚子以資政殿學士張叔夜簽書樞密  
院事金人攻宣化門姚仲友禦之辛丑金人攻南壁  
殺傷相當壬寅詔河北守臣盡起軍民兵倍道入援  
癸卯金人攻南壁張叔夜范瓊分兵襲之遙見金兵  
奔還自相蹈籍溺墮死者以千數甲辰大雨雪金人

陷亳州遣間使召諸道兵勤王乙巳大寒士卒噤戰不能執兵有僵仆者帝在禁中徒跣祈晴待勤王兵不至城中兵可用者惟衛士三萬然亦十失五六金人攻城急丙午雨木冰丁未始避正殿巳酉遣馮澥曹輔與宗室仲溫使金軍請和命康王爲天下兵馬大元帥速領兵入衛辛亥金人來議和要親王出盟壬子金人攻通津宣化門范瓊以千人出戰渡河水裂沒者五百餘人自是士氣益挫甲寅大風自北起俄大雨雪連日夜不止乙卯金人復使劉晏來趣親王宰相出盟丙辰妖人郭京用六甲法盡令守

禦人下城大啓宣化門出攻金人兵大敗京託言下城作法引餘兵遁去金兵登城衆皆披靡金人焚南薰諸門姚仲友死于亂兵宦者黃經國赴火死統制官何慶言陳克禮中書舍人高振力戰與其家人皆被害秦元領保甲斬關遁京城陷衛士入都亭驛執劉晏殺之丁巳奉道君皇帝寧德皇后入居延福宮命何棗及濟王栩使金軍戊午何棗入言金人邀上皇出郊帝曰上皇驚憂而疾必欲之出朕當親往自乙卯雪不止是日霽夜有白氣出太微彗星見庚申日赤如火無光辛酉帝如青城十二月壬戌朔帝在

宋史本紀卷三十三 十七  
青城蕭慶入居尚書省是日康王開大元帥府于相  
州癸亥帝至自青城甲子大索金帛丙寅遣陳過庭  
劉韜使兩河割地辛未定京師米價勸糶以振民癸  
酉斬行門指揮使蔣宣李福乙亥康王如北京丙子  
尚書省火庚辰雨雹癸未大雪寒縱民伐紫筠館花  
木爲薪庚寅康王如東平

二年春正月辛卯朔命濟王栩景王杞出賀金軍金  
人亦遣使入賀壬辰金人趣召康王還遣聶昌耿南  
仲陳過庭出割兩河地民堅守不奉詔凡累月止得  
石州甲午詔兩河民間門出降乙未有大星出建星

西南流入于濁没丁酉雨木冰己亥陰曠風迅發夜  
西北陰雲中有如火光庚子金人索金銀急何凜李  
若水勸帝親至軍中從之以太子監國而行乙巳籍  
梁師成家丙午劉韜自經于金軍太學生徐揆上書  
乞守明請帝還闕金人取至軍中揆抗論爲所殺至  
夜金人劫神衛營丁未大霧四塞金人下含輝門剽  
掠焚五岳觀二月辛酉朔帝在青城自如金軍都人  
出迎駕丙寅金人塹南薰門路人心大恐巳而金人  
令推立異姓孫傳方號慟乞立趙氏不允丁卯金人  
要上皇如青城以內侍鄧述所具諸王孫名盡取入

軍中辛未金人逼上皇召皇后皇太子入青城庚辰  
康王如濟州癸未觀文殿大學士唐恪仰藥自殺乙  
酉金人以括金未足殺戶部尚書梅執禮侍郎陳知  
質刑部侍郎程振給事中安扶三月辛卯朔帝在青  
城丁酉金人立張邦昌爲楚帝庚子金人來取宗室  
開封尹徐秉哲令民結保毋藏匿丁巳金人脅上皇  
北行夏四月庚申朔大風吹石折木金人以帝及皇  
后皇太子北歸凡法駕鹵簿皇后以下車輅鹵簿冠  
服禮器法物大樂教坊樂器祭器八寶九鼎圭璧渾  
天儀銅人刻漏占器景靈宮供器太清樓秘閣三館

書天下州府圖及官吏內人內侍技藝工匠娼優府  
庫畜積爲之一空辛酉北風大起苦寒五月庚寅朔  
康王卽位于南京遙上尊號曰孝慈淵聖皇帝紹興  
三十一年五月辛卯帝崩問至七月己丑上尊謚曰  
恭文順德仁孝皇帝廟號欽宗三十二年閏二月戊  
寅祔于太廟

贊曰帝在東宮不見失德及其踐阼聲技音樂一無  
所好靖康初政能正王黼朱勔等罪而竄殛之故金  
人聞帝內禪將有卷甲北旆之意矣惜其亂勢已成  
不可救藥君臣相視又不能同力協謀以濟斯難惴

惴然講和之不暇卒致父子淪胥社稷蕪蕪帝至於  
是蓋亦異懦而不知義者歟享國日淺而受禍至深  
考其所自真可悼也夫真可悼也夫

本紀卷第二十三

本紀卷第二十四

宋史二十四

勅修

高宗一

高宗受命中興全功至德聖神武文昭仁憲孝皇帝  
諱構字德基徽宗第九子母曰顯仁皇后韋氏大觀  
元年五月乙巳生東京之大內赤光照室八月丁丑  
賜名授定武軍節度使檢校太尉封蜀國公二年正  
月庚申封廣平郡王宣和三年十二月壬子進封康  
王資性朗悟博學彊記讀書日誦千餘言挽弓至一

石五斗宣和四年始冠出就外第靖康元年春正月  
金人犯京師軍于城西北遣使入城邀親王宰臣議  
和軍中朝廷方遣同知樞密院事李稅等使金議割  
太原中山河間三鎮遣宰臣授地親王送大軍過河  
欽宗召帝諭指帝慷慨請行遂命少宰張邦昌爲計  
議使與帝俱金帥幹離不留之軍中旬日帝意氣間  
暇二月會京畿宣撫司都統制姚平仲夜襲金人砦  
不克金人見責邦昌恐懼涕泣帝不爲動幹離不異  
之更請肅王癸卯肅王至軍中許割三鎮地進邦昌  
爲太宰留質軍中帝始得還金兵退復遣給事中王

雲使金以租賦贖三鎮地又以蠟書結遼降將耶律  
余覩爲金人所得八月金帥黏罕復引兵深入陷太  
原幹離不破真定冬十月王雲從吏自金先還言金  
人須帝再至乃議和雲歸言金人堅欲得地不然進  
兵取汴都十一月詔帝使河北奉袞冕玉輅尊金主  
爲伯上尊號十八字被命即發京師以門下侍郎耿  
南仲主和議請與俱乃以其子中書舍人延禧爲叅  
議官偕行帝由滑濟至磁州守臣宗澤請曰肅王去  
不返金兵已迫復去何益請留磁磁人以雲將挾帝  
入金遂殺雲時黏罕幹離不已率兵渡河相繼圍京

師從者以磁不可留知相州汪伯彥亦以蠟書請帝  
還相州閏月耿南仲馳至相見帝致辭以面受欽宗  
之旨盡起河北兵入衛帝乃同南仲募兵勤王初朝  
廷聞金兵渡河欲拜帝為元帥至是殿中侍御史胡  
唐老復申元帥之議尚書右僕射何輿擬詔書以進  
欽宗遣閣門祗候秦仔持蠟詔至相拜帝為河北兵  
馬大元帥知中山府陳亨伯為元帥汪伯彥宗澤為  
副元帥仔於頂髮中出詔帝讀之嗚咽兵民感動十  
二月壬戌朔帝開大元帥府有兵萬人分為五軍命  
武顯大夫陳淬都統制軍馬閣門祗候侯章齎蠟書

至自京師詔帝盡發河北兵命守臣自將帝乃下令  
諸郡守與諸將議引兵渡河乙亥帝率兵離相州丙  
子履水渡河丁丑次大名府宗澤以二千人先諸軍  
至知信德府梁揚祖以三千人繼至張俊苗傅楊沂  
中田師中皆在麾下兵威稍振會簽書樞密院事曹  
輔齎蠟詔至云金人登城不下方議和好可屯兵近  
甸毋輕動汪伯彥等皆信和議惟宗澤請直趨澶淵  
為壁次第解京城之圍伯彥南仲請移軍東平帝遂  
遣澤以萬人進屯澶淵揚言帝在軍中自是澤不復  
預府中謀議帝決意趨東平庚寅帝發大名

建炎元年春正月癸巳帝至東平初帝軍在相州京城圍久中外莫知帝處及是陳請四集取決帥府壬寅高陽關路安撫使黃潛善總管楊惟忠亦部兵數千至東平命潛善進屯興仁留惟忠為元帥都統制金人聞帝在澶淵遣甲士及中書舍人張澂來召宗澤命壯士射之澂乃遁伯彥等請帝如濟州二月庚辰發東平癸未次濟州時帥府官軍及群盜來歸者號百萬人分屯濟濮諸州府而諸路勤王兵不得進二帝已在金人軍中三月丁酉金人立張邦昌為帝稱大楚黃潛善以告帝慟哭僚屬欲奉帝駐軍宿州

謀渡江左帝聞二軍籍籍遂輒承制以宗澤為徽猷閣待制丁巳幹離不退師徽宗北遷戊午承制以汪伯彥為顯謨閣待制充元帥潛善為徽猷閣待制充副元帥夏四月黏罕退師欽宗伯遷癸亥邦昌尊元祐皇后為宋太后遣人至濟州訪帝又遣吏部尚書謝克家來迎耿南仲率幕僚勸進帝避席流涕遜辭不受伯彥等引天命人心為請立謂靖康紀元為十一月立康之兆帝曰當更思之以知淮寧府趙子崧為寶文閣學士元帥府參議官東南道總管統東南勒王兵邦昌遣閣門官贊舍人蔣思愈等持書詣帝



自言從權濟事及將歸寶避位之意帝亦貽諸帥書以未得至京已至者毋輒入聞資政殿大學士頴開封府事李綱在湖北遣劉默待書訪之又諭宗澤等以受僞命之人義當誅討然慮事出權宜未可輕動澤復書謂邦昌篡亂踪跡已無可疑宜早正天位興復社稷不可不斷門下侍郎呂好問亦以蠟書來言帝不自立恐有不當立而立者丁卯謝克家以大宋受命之寶至濟州帝慟哭跪受命克家還京師趣辦儀物戊辰濟州父老詣軍門言州四旁望見城中人光屬天請帝卽位于濟會宗澤來言南京乃藝祖興

王之地取四方中漕運尤易遂失意趨應天是夕邦昌手書上延福宮太后尊號曰元祐皇后入居禁中以尚書左丞馮澥爲奉迎使皇后又遣兄子衛尉少卿孟忠厚持手書遺帝皇后垂簾聽政邦昌權尚書左僕射率在京百官上表勸進不許甲戌皇后手書告中外俾帝嗣統乙亥百官再上表久不許丁丑馮澥等至濟州百官三上表許以權聽國事戊寅命宗澤先勒兵分駐長垣韋城等縣以備非常東道副總管朱勝非至濟州宣撫司統制官韓世忠以兵來會庚辰帝發濟州酈延副總管劉光世自陝州來會以

光世爲五軍都提舉辛巳次單州壬午次虞城縣西  
道都統管王襄自襄陽來會癸未至應天府皇后詔  
有司備法駕儀仗乙酉張邦昌至伏地慟哭請死帝  
慰撫之承制以汪伯彥爲顯謨閣直學士黃潛善爲  
徽猷閣直學士權吏部尚書王時雍等奉乘輿服御  
至羣臣勸進者益衆命有司築壇府門之左五月庚  
寅朔帝登壇受命禮畢慟哭遙謝二帝卽位于府治  
改元建炎大赦常赦所不原者咸赦除之張邦昌及  
應于供奉金國之人一切不問命西京留守司脩奉  
祖宗陵寢罷天下神霄宮住散青苗錢應死節及歿

下主事者並推恩奉使未還者祿其家一年應選人  
並循資已係承直郎者改次等京官臣僚因亂去官  
者限一月還任潰兵群盜咸許自新免係官欠負蠲  
南京及元帥府常駐軍一月以上州縣夏稅應天府  
特奏名舉人並與同進士出身免解人與免省諸路  
特奏名三舉以上及宗室嘗預貢者並推恩應募兵  
勤王人以兵付州縣主兵官聽赴行在中外臣庶許  
言民間疾苦雖詆訐亦不加罪命官犯罪更不取特  
旨裁斷蔡京童貫朱勔李彥孟昌齡梁師成譚稹及  
其子孫更不收叙内外大臣限十日各舉布衣有材

畧者一人餘如故事以黃潛善爲中書侍郎汪伯彥同知樞密院事元祐皇后在東京是日徹簾辛卯遙尊乾龍皇帝爲孝慈淵聖皇帝元祐皇后爲元祐太后詔史官辨宣仁聖烈皇后誣謗築景靈宮于江寧府壬辰以張邦昌爲太保奉國軍節度使同安郡王五日一赴都堂參決大事以河東北宣撫使范訥爲京城留守癸巳遙尊帝母韋賢妃爲宣和皇后遙立嘉國夫人邢氏爲皇后耿南仲罷甲午以李綱爲尚書右僕射兼中書侍郎趣赴行在楊惟忠爲建武軍節度使主管殿前司公事罷諸盜及民兵之爲統制

者簡其士馬隸五軍乙未以生辰爲天申節馮澥罷以兵部尚書呂好問爲尚書右丞命中軍統制馬忠後軍統制張換率兵萬人趣河間府追襲金人丙申以呂好問兼門下侍郎丁酉以黃潛善兼御營使汪伯彥副之真定府路副總管王淵爲都統制鄜延路副總管劉光世提舉一行事務王時雍黃州安置命統制官薛廣張瓊率兵六千人會河北山東砦義兵共復磁相戊戌以資政殿學士路允迪爲京城撫諭使龍圖閣學士耿延禧副之贈吏部侍郎李若水觀文殿學士諡忠愍己亥詔太學生陳東赴行在李綱

至江寧誅叛卒周德等庚子詔以靖康大臣主和誤國責李邦彥爲建寧軍節度副使潯州安置徙吳敏柳州蔡懋英州李枕宇文虛中鄭望之李鄴皆以使金請割地責廣南諸州並安置辛丑詔張邦昌知幾達變勲在社稷如文彥博例月兩赴都堂壬寅封後宮潘氏爲賢妃以江淮發運使梁揚祖提領東南茶鹽事癸卯天申節罷百官上壽乙巳賜諸路勤王兵還營者錢人三千丙午以誣謗宣仁聖烈皇后追貶蔡確蔡卞邢恕蔡懋官以保靜軍節度使姚古知河南府金人陷河中府權府事郝仲連死之丁未徽宗

至燕山府庚戌以宗澤爲龍圖閣學士知襄陽府壬子進張邦昌太傅丙辰罷監察御史張所尋責江州安置丁巳詔成都在京兆襄陽荆南江寧府鄧揚二州儲資糧修城壘以避巡幸以簽書樞密院事張叔夜嘗援京城力戰從徽宗北行遙命爲觀文殿大學士醴泉觀使戊午右諫議大夫范宗尹罷遣太常少卿周望使河北軍前通問二帝西道總管王襄北道總管趙野坐勤王稽緩並分司襄陽府青州居住尋責襄永州野邵州並安置六月己未朔李綱入見上十議曰國是巡幸赦令僭逆僞命戰守本政責成脩德

以前殿前副都指揮使王宗濳引衛兵遁逃致都城失守責官邵州安置徽猷閣直學士徐秉哲假資政殿學士爲大金通問使秉哲辭庚寅封靖康軍節度使仲湜嗣濮王黏罕還屯雲中辛酉命新任郎官未經上殿者並引對御史中丞顏岐罷徐秉哲責官梅州安置詔河北京陝淮湖江浙軍州縣鎮募人脩築城壁壬戌置登聞檢鼓院癸亥以黃潛善爲門下侍郎兼權中書侍郎張邦昌坐僭逆責降昭化軍節度副使潭州安置及受僞命臣僚王時雍高州吳玠永州莫儔全州李耀柳州孫覲歸州並安置顏博文王

紹以下論罪有差以知懷州霍安國河東宣撫使劉韜死節贈安國延康殿學士韜資政殿大學士甲子命李綱兼御營使乙丑以龍神衛四廂都指揮使馬忠爲河北經制使措置民兵洪芻罷左諫議大夫下臺獄丁卯以祠部員外郎喻汝礪爲四川撫諭督漕計羨緡及常平錢物罷開封諸州軍府司錄曹掾官州軍通判二員者省其一權減宰執奉賜三之一省諸路提舉常平司兩浙福建提舉市舶司賊李孝忠寇襄陽守臣黃叔敖棄城遁立格買馬辛未以子粵生大赦籍天下神霄宮錢穀充經費拘天下職田錢

隸提刑司還元祐黨籍及上書人恩數癸酉詔陝西  
山東諸路帥臣團結軍民互相應援乙亥增諸縣弓  
手置武尉領之宗室叔向以所募勤王兵屯京師或  
言爲變命劉光世捕誅之戊寅以汪伯彥知樞密院  
事遣宣義郎傅雱使河東軍前通問二帝己卯置沿  
河沿淮沿江帥府十有九要郡三十九次要郡三十  
八帥守兼都總管守臣兼鈐轄都監總置軍九十六萬  
七千五百人別置水軍七十七將造舟江淮諸路置  
三省樞密院賞功司東京留守范訥落節鉞淄州居  
住庚辰以二帝未還禁州縣用樂辛巳置沿河巡察

六使壬午以戶部尚書張慤同知樞密院事兼提舉  
措置戶部財用癸未呂好問罷甲申併尚書戶部右  
曹所掌歸左曹命尚書總領乙酉以宗澤爲東京畱  
守杜充爲北京留守罷監司州郡職田丙戌詔陝西  
河北京東西路募兵合十萬人更番入衛行在命京  
東西路造戰車丁亥以張所爲河北西路招撫使括  
買官民馬勸出財助國戊子以錢蓋爲陝西經制使  
封趙懷恩爲安化郡王因召五路兵赴行在秋七月  
己丑朔以樞密副都承旨王瓌爲河東經制使庚寅  
詔王淵劉光世統制官張俊喬仲福韓世忠分討陳

州軍賊杜用京東賊李昱及黎驛魚臺潰兵皆平之  
辛卯籍東南諸州神霄宮及贍學錢助國用叙右監  
門衛大將軍貴州團練使士瑋以磁洛義兵復洛州  
乙未以温州觀察使范瓊爲定武軍承宣使御營司  
同都統制丙申賜諸路疆壯巡社名爲忠義巡社專  
隸安撫司戊戌欽宗至燕山府以忻州觀察使張換  
爲河北制置使東都宣武卒杜林謀據成都叛伏誅  
己亥詔臺省寺監繁簡相兼學官館職減舊制之半  
辛丑復議吳玠莫儔等十一人罪並廣南江湖諸州  
安置餘遞貶有差壬寅詔奉元祐太后如東南六宮及

衛士家屬從行朕當獨留中原與金人決戰以延康  
殿學士許翰爲尚書右丞甲辰以右諫議大夫宋齊  
愈當金人謀立異姓書張邦昌姓名斬于都市乙巳  
手詔京師未可往當巡幸東南丙午詔定議巡幸南  
陽以觀文殿學士范致虛知鄧州脩城池繕宮室輸  
錢穀以實之丁未遣官詣京師迎奉太廟神主赴行  
在配罷四道都總管以尚書虞部員外郎張浚爲殿  
中侍御史庚戌徵諸道兵期八月會行在丙辰徽宗  
自燕山密遣閣門宣贊舍人曹勛至賜帝絹半臂書  
其領曰便可即真來援父母帝泣以示輔臣張所傳

亮軍發行在是月關中賊史斌犯興州僭號稱帝八月戊午朔漢陽等坐圍城日括金銀自盜及私納官人芻及余大均陳冲貸死流沙門島餘五人罪有差勝捷軍校陳通作亂于杭州執帥臣葉夢得殺漕臣吳昉己未元祐太后發京師庚申以劉光世爲奉國軍節度使韓世忠張俊皆進一官辛酉右司諫潘良貴罷壬戌以李綱爲尚書左僕射兼門下侍郎黃潛善爲右僕射兼中書侍郎張慤兼御史副使癸亥命御營使副大閱五軍庚午更號元祐太后爲隆祐太后辛未罷傅亮經制副使召赴行在壬申召布衣

定赴行在命御營統制辛道宗討陳通是夕東北方有赤氣癸酉以耿南仲主和誤國南雄州安置乙亥用張浚言罷李綱左僕射丙子隆祐太后發南京命侍衛馬軍都指揮使郭仲荀護衛如江兼節制江淮荆浙閩廣諸州制置東南盜賊丁丑以龍圖閣直學士錢伯言知杭州節制兩浙淮東將其及福建槍校手討陳通庚辰降榜招諭杭州亂兵壬午用黃潛善議殺上書太學生陳東崇仁布衣歐陽澈乙酉遣兵部員外郎江端友等撫諭閩浙湖廣江淮京東西諸路及體訪官吏貪廉軍民利病許翰罷丁亥博州



卒宮儀作亂犯萊州九月己丑建州軍校張真等作  
亂執守臣張動轉運副使毛奎爲所殺判官曹存嬰  
城自守范瓊捕斬李孝忠于復州壬辰以金人犯河  
陽汜水軍詔擇日巡幸淮甸鑄建炎通寶錢命淮浙  
沿海諸州增脩城壁招訓民兵以備海道甲午命揚  
州守臣呂頤浩繕脩城池宗澤往河北視師七月還  
是夜辛道宗兵潰于嘉興縣丁酉詔荆襄關陝江淮  
皆備巡幸戊戌罷買馬己亥以子粵爲檢校少保集  
慶軍節度使封魏國公詔內外官司參用嘉祐元豐  
敕以俟新書庚子二帝徙居霄郡辛丑陳通劫提點

刑獄周格營殺格執提點刑獄高士瞻壬寅遣徽猷  
閣待制孟忠厚迎奉太廟神土赴揚州以直秘閣王  
圭爲招撫判官代張所尋責所廣南安置乙巳宗澤  
表請車駕還闕戊申河北招撫司都統制王彥渡河  
擊金人破之復新興縣己酉以諜報金人欲犯江浙  
詔暫駐淮甸捍禦稍足卽還京闕募民入貲授官軍  
賊趙萬入常州執守臣何袞罷諸路經制招撫使庚  
戌始通當三大錢于淮浙荆湖諸路壬子命湖南撫  
諭官馬伸持詔賜張邦昌死于潭州併誅王時雍癸  
丑詔有敢妄議惑衆沮巡幸者許告而罪之不告者

宋史本紀卷二十四  
三十一  
斬乙卯王彥及金人戰敗續奔太行山聚衆其裨將  
岳飛引其部曲自爲一軍趙萬陷鎮江府守臣趙于  
崧棄城渡江保瓜洲是秋金人分兵據兩河州縣惟  
中山慶源府保莫邪洛冀磁絳相州久之乃陷冬十  
月丁巳朔帝登舟幸淮甸戊午太后至揚州己未罷  
諸路勸誘獻納錢物庚申罷諸路召募潰兵忠義等  
人及寄居官擅集勤王兵者癸亥募羣盜能併滅賊  
衆者官之甲子以張浚論李綱不已落綱觀文殿大  
學士正奉宮祠知秀州兼權浙西提點刑獄趙叔近  
入杭州招撫陳通乙丑罷帥府要郡次要郡及新軍

水軍丁卯以王淵爲杭州制置盜賊使統制官張俊  
從行庚午次泗州幸普照寺甲戌太白晝見己卯次  
楚州寶應縣後軍將孫琦等作亂逼左正言盧臣中  
墮水死庚辰命劉光世討鎮江叛兵辛巳以光世爲  
滁和濠州江寧府界招捉盜賊制置使御營統制官  
苗傅爲使司都統制朝請郎李棫提舉廣西左右兩  
江峒丁公事癸未至揚州禁內侍統兵官相見丙戌  
王淵張俊誘趙萬等悉誅之十一月戊子李綱鄂州  
居住真定軍賊張遇入池州守臣滕祐棄城遁己丑  
詔雜犯死罪有疑及情理可憫者撫諭官同提刑司

酌情減降先斷後聞壬辰遣王倫等爲金國通問使  
乙未以張慤爲尚書左丞工部尚書顏岐同知樞密  
院事內申曲赦應天府亳宿楊泗楚州高郵軍丙午  
以張慤爲中書侍郎戊申以顏岐爲尚書左丞兼權  
門下侍郎御史中丞許景衡爲右丞刑部尚書郭三  
益同知樞密院事權密州趙野棄城遁軍校杜彥據  
州追野殺之辛亥命福建路增招弓手金人陷河間  
府是月軍賊丁進圍壽春府守臣康允之拒却之十  
二月丙辰朔命從臣四員充講讀官就內殿講讀丁  
巳詔諸路提刑司選官卽轉運司所在州類省試進

士以待親策辛酉王淵入杭州執陳通等誅之壬戌  
青州敗將王定以兵作亂殺帥臣魯孝序癸亥黏罕  
犯汜水關西京留守孫昭遠遣將拒之戰歿昭遠引  
兵南遁尋命部將王仔奉啓運宮神御赴行在甲子  
改授后父徽猷閣待制邢煥爲光州觀察使乙丑詔  
凡刑賞大政並經三省其干請墨敕行下者罪之丙  
寅張遇犯江州戊辰金人圍棣州守臣姜剛之固守  
金兵解去甲戌金人陷同州守臣鄭驥死之張遇犯  
黃州己卯金人陷汝州入西京庚辰金人陷華州辛巳  
破潼關河東經制使王瓌自同州引兵遁入蜀丁進

諸宗澤降乙酉增置廣西弓手以備邊以戶部尚書黃潛厚為延康殿學士同提舉措置財用

本紀卷第二十四

本紀卷第二十五

宋史二十五

開府儀同三司在國錄軍國事前中書右丞相監修國史領經筵事都總裁臣脫脫等奉  
勅

高宗二

二年春正月丙戌朔帝在揚州丁亥錄兩河流域亡吏士沿河給流民官田牛種戊子金人陷鄧州委撫劉汲死之辛卯置行在權貨務壬辰金人犯東京宗澤遣將擊郟之癸巳復明法新科甲午詣壽寧寺謁祖宗神主乙未金人破永興軍前河東經制副使傅亮以兵降經略使唐重副總管楊宗閔提舉軍馬陳廸

轉運副使桑景詢判官曾謂提點刑獄郭忠孝經略  
司主管機宜文字王尚及其子建中俱死之東平府  
兵馬鈐轄孔彥舟板渡淮犯黃州守臣趙令歲拒之  
丙申詔自今犯枉法自盜賊者中書籍其姓名罪至  
徒者永不錄用金人陷均州守臣楊彥明遁去丁酉  
金人陷房州己亥張遇焚真州祕閣脩撰孫昭遠爲  
亂兵所害庚子遣主客員外郎謝亮爲陝西撫諭使  
兼宣諭使待詔賜夏國張遇陷鎮江府守臣錢伯言  
棄城走辛丑內侍邵成章坐輒言人臣除名南雄州  
編管金人陷鄭州通判趙伯振死之癸卯金帥窩里

唄陷濰州又陷青州尋棄去丁未詔諭流民潰兵之  
爲盜賊者釋其罪己酉禁諸將引潰兵入蜀置大散  
關使以審驗之庚戌遣考功員外郎傅雱爲淮東京  
東西撫諭使辛亥王淵招降張遇以所部萬人隸韓  
世忠改授顯謨閣直學士孟忠厚爲常德軍承宣使  
詔凡后族毋仕侍從官著爲令金人焚鄧州是月以  
中奉大夫劉豫知濟南府金人陷潁昌府守臣孫默  
爲所殺經制司僚屬王擇仁復永興軍金人陷秦州  
經略使李復降又犯熙河經略使張深遣兵馬都監  
劉惟輔與戰于新店敗之斬其帥黑鋒二月丙辰金

人再犯東京宗澤遣統制閻中立等拒之中立戰歿  
戊午移耿南仲于臨江軍金人陷唐州壬戌安化軍  
節度副使宇文虛中應詔使絕域復中大夫召赴行  
在癸亥罷市易務甲子金人犯滑州宗澤遣張撝救  
之戰死乙丑澤遣判官范世延等表請帝還闕河北  
賊楊進等詣澤降丁卯復延康述古殿直學士爲端  
明樞密直學士辛未詔自今犯枉法自盜贓罪至歿  
者籍其貲壬申赦福州叛卒張員等癸酉金人陷蔡  
州執守臣閻孝忠丙子金人陷淮寧府守臣向子詔  
歿之丁丑遣王貺等充金國軍前通問使戊寅責降

知鎮江府趙子崧爲單州團練副使南雄州安置巳  
卯奪祕書正字胡理官送梧州編管朝奉大夫劉正  
彥應詔使絕域授武德大夫威州刺史尋爲御營右  
軍副統制庚申以王淵爲嚮德軍節度使辛巳武功  
大夫和州防禦使馬擴奔真定五馬山砦聚兵得皇  
弟信王榛于民間奉之總制諸砦壬午詔京畿京東  
西河北淮南南路置振華軍八萬人是月成都守臣盧  
法原修城成三月辛卯金人陷中山府壬辰詔諸路  
安撫使許便宜節制官吏丁酉初立大小使臣呈試  
弓馬出官格先閱試然後奏補黏罕焚西京去庚子

河南統制官翟進復西京宗澤奏進爲京西北路安撫制置使丙午遙授尚書右僕射何臬爲觀文殿大學士中書侍郎陳過庭爲資政殿大學士同知樞密院事聶昌爲資政殿大學士並主管宮觀時臬已卒于金昌爲人所殺朝廷未之知過庭亦在金軍中丁未罷內外權局官之不應法者遣楊應誠爲大金高麗國信使己酉張員等復作亂擁衆突城出命本路提點刑獄李筵討捕之辛亥以范瓊權同主管侍衛步軍司公事屯真州是月金人陷鳳翔府守臣劉清臣棄城去又犯涇原經略使曲端遣將拒戰敗之金

兵走同華石壕尉李彥仙舉兵復陝州夏四月丙辰詔文臣從官至牧守武臣管軍至遙郡各舉所知二人戊午禁州縣責鄰保代輸逃戶稅役宗澤遣將趙世興復滑州乙丑翟進以兵襲金帥兀室于河南兵敗其子亮死之進又率御營統制韓世忠京城都巡檢使丁進等兵戰于文家寺又敗世忠收餘兵南歸兀室復入西京尋棄去隴右都護張巖及金人戰于五里坡敗績死之丁卯金人入洛州壬辰軍賊孫琦焚隨州癸未入唐州信王榛遣馬擴來奏事是月以榛爲河外兵馬都元帥擴爲元帥府馬步軍都總管

五月乙酉許景衡罷孫琦犯德安府丙戌命參酌元  
祐科舉條制立詩賦經義分試法戊子以翰林學士  
朱勝非爲尚書右丞辛卯以金兵渡河遣韓世忠宗  
澤等逆戰甲午曲赦河北陝西京東路福建轉運判  
官謝如意執張員等六人誅之丙申復命宇文虛中  
爲資政殿大學士充金國祈請使賊靳賽寇光山縣  
戊戌河北制置使王彥部兵渡河屯滑州之沙店癸  
卯張慤薨甲辰金帥婁宿陷絳州丁未復置兩浙福  
建提舉市舶司己酉秀州卒徐明等作亂執守臣朱  
芾迎前守趙叔近復領州事命御營中軍統制張俊

討之癸丑罷借諸路職田六月乙卯印州鑄錢增印  
錢引癸亥建州卒葉濃等作亂寇福州甲子親慮囚  
乙丑張俊至秀州殺趙叔近執徐明斬之甲戌葉濃  
陷福州丁丑詔江浙沿流州軍練水軍造戰艦京畿  
淮甸蝗是月以知延安府王庶節制陝西六路軍馬  
涇原經略使曲端爲節制司都統制永興軍經略使  
郭琰逐王擇仁擇仁奔興元秋七月甲申葉濃入寧  
德縣復還建州命張俊同兩浙提點刑獄趙哲率兵  
討之丙戌詔吏部審量京官非政和以後進書頌及  
直赴殿試人乃聽參選宗澤薨丁亥詔百官坐蔡京



王黼擬授而廢者許自新復用戊子禁軍中抉目刳心之刑壬辰選江浙州軍正兵士兵六之一赴行在乙未以郭仲旬爲京城副留守戊戌錄內外諸軍將士功辛丑以春霖夏旱蝗詔監司郡守條上闕政州郡災甚者蠲田賦甲辰以降授北京留守杜充復樞密直學士爲開封尹東京留守八月甲寅初鑄御寶三甲戌御集英殿策試禮部進士罷殿中侍御史馬伸尋貴濮州河北京東捉殺使李成叛辛巳犯宿州是月二帝徙居韓州九月甲申丁進叛復寇淮西庚寅賜禮部進士李易以下四百五十一人及第出身

特奏名進士皆許調官壬辰召侍從所舉褚宗諤等二十一人驛赴行在癸巳金人陷冀州將官李政死之甲午金人再犯永興軍經畧使郭琰棄城退保義谷辛丑陝西節制司兵官賀師範及金人戰于八公原敗績死之丙午復所滅京官奉丁未東京留守統制官薛廣及金人戰于相州敗死巳酉郭三益薨是秋窩里温榭懶破五馬山砦信王榛不知所終馬擴軍敗于北京之清平冬十月甲寅命揚州濬隍修城闕江淮州郡水軍楊應誠還自高麗戊午遣劉光世討李成壬戌禁江浙閉糴癸亥黏罕圍濮州遣韓世忠

范瓊領兵至東平開德府分道拒戰又命馬擴援之甲子命孟忠厚奉隆祐太后幸杭州楊進復叛攻汝洛命翟進擊于鳴臯山翟進戰死丙子罷吏部審量崇寧大觀以來濫賞止令自陳是月劉正彥擊丁進降之十一月辛巳朔提舉嵩山崇福宮李綱責授單州團練副使萬安軍安置劉光世及李成戰于新息縣成敗走高麗國王王楷遣其臣尹彥頤入見金人圍陝州守臣李彥仙拒戰卻之壬辰金人陷延安府權知府劉選總管馬忠皆遁通判府事魏彥明死之癸巳趙哲大破葉濃于建州城下濃遁而降復謀為

變張俊擒斬之乙未金人陷濮州執守臣楊粹中又陷開德府守臣王棣歿之以魏行司充金國軍前通問使庚子詣壽寧寺朝饗祖宗神主壬寅冬至祀昊天上帝于園丘以太祖配大赦金人陷相州守臣趙不試歿之甲辰陷德州兵馬都監趙叔取歿之庚戌立士庶子弟習射補官法是月節制陝西軍馬王庶為都統制曲端所拘奪其印四川茶馬趙開罷官買賣茶給引通商如政和法金人犯晉寧軍守臣徐徽言拒卻之知府州折可求以城降金人陷淄州涇原兵馬都監吳玠襲斬史贊濱州賊蓋進陷棣州守臣

姜剛之死之京東賊李民詣行在請降王淵殲其衆留民爲將十二月乙卯太后至杭州扈從統制苗傅以其軍八千人駐奉國寺庚申金人犯東平府京西路制置使權邦彥棄城去又犯濟南府守臣劉豫以城降甲子金人陷大名府提默刑獄郭永罵敵不屈死之轉運判官裴億降又陷襲慶府乙丑陷虢州丙寅初命修國史巳巳以黃潛善爲尚書左僕射兼門下侍郎汪伯彥右僕射兼中書侍郎顏岐門下侍郎朱勝非中書侍郎兵部尚書盧益同知樞密院事辛未金人犯青州丁丑特進致仕余深金紫光祿大夫

致仕薛昂並分司進昌軍徽州居住耿南仲再責單州別駕唐恪追落觀文殿大學士戊寅以禮部侍郎張浚兼御營參贊軍事教習長兵是冬杜充決黃河自泗入淮以阻金兵

三年春正月庚辰朔帝在揚州以京西北路兵馬鈐轄翟興爲河南尹京西北路安撫制置兼招討使京西賊貴仲正陷岳州甲申以資政殿學士路允迪簽書樞密院事丁亥金人再陷青州又陷濰州焚城而去京東安撫劉洪道入青州守之巳丑奉安西京會聖宮累朝御容于壽寧寺占城國入貢趣大金通問

宋史本紀卷第五十一  
八  
使李鄴周望宋彥通吳德休等往軍前辛卯陝州都  
統邵興及金人戰于潼關敗之復虢州乙未杜充遣  
岳飛桑仲討其叛將張用于城南其徒王善救之官  
軍敗績庚子張用王善寇淮寧府守臣馮長寧却之  
詔百官聞警遣家屬避兵致物情動搖者流丙午黏  
罕陷徐州守臣王復及子倚死之軍校趙立結鄉兵  
爲興復計御營平寇左將軍韓世忠軍潰于沐陽其  
將張遇死世忠奔鹽城金兵執淮陽守臣李寬殺轉  
運副使李跋以騎兵三千取彭城間道趣淮甸戊申  
至泗州二月庚戌朔始聽士民從便避兵命劉正彥

部兵衛皇子六宮如杭州江淮制置使劉光世阻淮  
拒金人敵未至自潰金人犯楚州守臣朱琳降辛亥  
金人陷天長軍壬子內侍鄭詢報金兵至帝被甲馳  
幸鎮江府是日金兵過揚子橋癸丑游騎至瓜洲太  
常少卿季陵奉太廟神主行金兵追之失太祖神主  
王淵請幸杭州命留朱勝非守鎮江以吏部尚書呂  
頤浩爲資政殿大學士江淮制置使都巡檢使劉光  
世爲殿前都指揮使充行在五軍制置使駐鎮江府  
控扼江口主管馬軍司楊惟忠節制江東軍馬駐江  
寧府是夕發鎮江次呂城鎮金人入真州甲寅次常

州御營統制王亦謀據江寧不克而遁御營平寇前  
將軍范瓊自東平引兵至壽春其部兵殺守臣鄧紹  
密丙辰次平江府丁巳金人犯秦州守臣魯班以城  
降丁進縱兵剽掠王淵誘誅之戊午次吳江縣命朱  
勝非節制平江府秀州控扼軍馬禮部侍郎張浚副  
之又命勝非兼御營副使留王淵守平江以忠訓郎  
劉俊民爲閤門祗候齋書使金軍詔錄用張邦昌親  
屬仍命俊民持邦昌貽金人約和書藁以行金人陷  
滄州守臣劉錫棄城走己未次秀州命呂頤浩往來  
經制長江以龍圖閣待制知江州陳彥文爲沿江措

置使庚申次崇德縣呂頤浩從行卽拜同簽書樞密  
院事江淮兩浙制置使以兵三千還屯京口又命御  
營中軍統制張俊以兵八千守吳江吏部員外郎鄭  
資之爲沿江防托監察御史林之平爲沿海防托募  
海舟守隘壬戌駐蹕杭州金人陷晉寧軍守臣徐徽  
言死之癸亥下詔罪已求直言令有司具舟常湖迎  
濟衣冠軍民家屬省儀物膳羞出官人之無職掌者  
乙丑降德音赦雜犯死罪以下囚放還士大夫被竄  
斥者惟李綱罪在不赦更不放還蓋用黃潛善計罪  
綱以謝金人置江寧府權貨務都茶場丁卯百官入

見應迪功郎以上並赴朝參戊辰出米十萬斛卽杭  
秀常湖州平江府損直以糴濟東北流寓之人金人  
焚揚州已巳用御史中丞張徵言罷黃潛善汪伯彥  
以戶部尚書葉夢得爲尚書左丞徵爲右丞庚午詔  
平江鎮江府常湖杭越州具寓居京朝官已上姓名  
以備簡拔分命浙西監司等官募土豪守千秋垂脚  
襄陽諸嶺以扼宣常諸州險要金人去揚州辛未詔  
御營使司唯掌行在五軍凡邊防經制並歸三省樞  
密金人過高郵軍守臣趙士瑗棄城走潰兵宋進犯  
泰州守臣曾班遁壬申罷寧朗司括歛民財者呂頤

浩遣將陳彥渡江襲金餘兵復揚州癸酉靳賽犯通  
州韓世忠小校李在叛據高郵甲戌黃潛善汪伯彥  
並落職乙亥召朱勝非赴行在留張浚駐平江贈陳  
東歐陽澈承事郎官有服親一人恤其家召馬伸赴  
行在卒贈直龍圖閣丙子詔士民直言時政得失是  
月以王庶爲陝西節制使爲京兆府節制司都統制  
曲端爲鄜延經略使知延安府張用據確山號張奔  
蕩三月巳卯朔日中有黑子庚辰以朱勝非爲尚書  
右僕射兼中書侍郎辛巳葉夢得罷以盧益爲尚書  
右丞未拜復罷爲資政殿學士御營都統制王淵同

簽書樞密院事呂頤浩爲江南東路安撫制置使知江寧府壬午詔王淵免進呈書押本院文字扈從統制苗傅忿王淵驟得君劉正彥怨招降據盜而賞薄帝在揚州闈官用事恣橫諸將多疾之癸未傅正彥等叛勒兵向闕殺王淵及內侍康履以下百餘人帝登樓以傅爲慶遠軍承宣使御營使司都統制正彥涇州觀察使副都統制傅等迫帝遜位于皇子魏國公請隆祐太后垂簾同聽政是夕帝移御顯寧寺甲申尊帝爲睿聖仁孝皇帝以顯寧寺爲睿聖宮大赦以張澂兼中書侍郎韓世忠爲御營使司提舉一行

事務前軍統制張俊爲秦鳳副總管分其衆隸諸軍丁亥以東京留守杜充爲資政殿大學士節制京東西路殿前副都指揮使東京副留守郭仲荀進昭化軍節度使分窠內侍藍珪高邈張去爲張旦曾擇陳永錫于嶺南諸州擇已行傅追還殺之呂頤浩至江寧戊子以端明殿學士王孝廸爲中書侍郎盧益爲尚書左丞張俊部衆八千至平江張浚諭以決策起兵問罪約呂頤浩劉光世招韓世忠來會己丑改元明受張浚奏乞睿聖皇帝親總要務庚寅百官始朝睿聖宮以苗傅爲武當軍節度使劉正彥爲武成軍

節度使劉光世爲太尉淮南制置使范瓊爲慶遠軍節度湖北制置使楊惟忠加少保張浚爲禮部尚書及呂頤浩並赴行在傅等以御營中軍統制吳湛主管步軍司黃潛善汪伯彥並分司衡永州居住王孝迪盧益爲大金國信使進士黃太本吳時敏爲先期告請使置行在都茶場呂頤浩奏請睿聖皇帝復大位金人陷鄜州癸巳張浚命節制司參議官辛道宗措置海舶遣布衣馮輜持書說傅正彥甲午有司請尊太后爲太皇太后不許呂頤浩率勤王兵萬人發江寧乙未再貶黃潛善鎮東軍節度副使英州安置

劉光世部兵會呂頤浩于丹陽丙申韓世忠自鹽城收散卒至平江張俊假兵二千戍赴行在辛丑傅等以世忠爲定國軍節度使張俊爲武寧軍節度使知鳳翔府張浚責黃州團練副使彬州安置俊等皆不受傅等遣軍駐臨平拒勤王兵壬寅日中黑子沒盧益罷呂頤浩至平江水賊邵青入泗州癸卯太后詔睿聖皇帝宜稱皇太弟天下兵馬太元帥康王皇帝稱皇太姪監國賜傅正彥鐵券呂頤浩張浚傳檄中外討傅正彥執黃太本下獄乙巳太后降旨睿聖皇帝處分兵馬重事張俊率兵發平江劉光世繼之



丙午張浚同知樞密院事翰林學士李邴御史中丞鄭穀並同簽書樞密院事呂頤浩張浚發平江丁未次吳江奏乞建炎皇帝還卽尊位朱勝非召傅正彥至都堂議復辟傅等遂朝睿聖宮金人陷京東諸郡劉洪道棄青州去槌懶以劉豫知東平府節制河南州郡趙立復徐州夏四月戊申朔太后下詔還政皇帝復大位帝還宮與太后御前殿垂簾詔尊太后爲隆祐皇太后已酉詔訪求太祖神主以苗傅爲淮西制置使劉正彥副之庚戌復紀年建炎命張浚知樞密院事苗傅劉正彥並檢校少保呂頤浩張浚軍次

臨平苗翊馬柔吉拒戰不勝傅正彥引兵二千夜遁辛亥皇太后撤簾呂頤浩等入見傅犯富陽新城二縣遣統制王德喬仲福追擊之癸未朱勝非顏岐王孝迪張澂路允迪俱罷以呂頤浩爲尚書右僕射兼中書侍郎李邴尚書右丞鄭穀簽書樞密院事甲寅以劉光世爲太尉御營副使韓世忠爲武勝軍節度使御前左軍都統制張俊爲鎮西軍節度使御前右軍都統制勤王所僚屬將佐進官有差主管殿前司土元左言並責官英賀州安置樞密都承旨馬瑗停官永州居住吏部員外郎范仲熊浙西安撫司主管

機宜文字時希孟並除名柳州吉陽軍編管斬中軍  
統制吳湛工部侍郎王世修于市贈王淵開府儀同  
三司乙卯大赦舉行仁宗法度應嘉祐條制與今不  
同者自官制役法外賞格從重條約從寬罷上供不  
急之物元祐石刻黨人官職恩數追復未盡者令其  
家自陳許中外自陳丁巳禁內侍交通主兵官及饋  
遺假貸借役禁兵干預朝政庚申詔尚書左右僕射  
並帶同中書門下平章事改門下中書侍郎爲參知  
政事省尚書左右丞以李邴參知政事詔行在職事  
官各舉所知併省館學寺監等官苗傅犯衢州癸亥

以給事中周望爲江浙制置使丁卯帝發杭州留鄭  
穀衛皇太后以韓世忠爲江浙制置使及劉光世追  
討傅正彥巳巳詔傅正彥苗塢苗翊張達不赦餘黨  
並原壬申立子魏國公粵爲皇太子赦傅黨王鈞甫  
馬柔吉罪許其自歸丙子范瓊自光蘄引兵屯洪州  
是月劉文舜寇濠州西北賊薛慶襲據高郵軍五月  
戊寅朔帝次常州以張浚爲宣撫處置使以川陝京  
西湖南北路隸之聽便宜黜陟庚辰苗傳統領官張  
翼斬王鈞甫馬柔吉降辛巳次鎮江府遣祭張懃陳  
東墓詔恤其家癸未以翰林學士滕康同簽書樞密

院事乙酉至江寧府駐蹕神霄宮改府名建康起復朝散郎洪皓爲大金通問使丁亥以徽猷閣直學士陳彥文提領水軍措置江浙防托召藍珪等速還朝已丑韓世忠追討傅正彥于浦城縣獲正彥傅遁走張浚撫諭薛慶于高郵爲慶所留乙未浚罷以御營前軍統制王瓌爲淮南招撫使己亥復置中書門下省檢正官省左司郎中二員苗傅裨將江池殺苗翊降于周望傳走建陽縣土豪詹標執之以獻辛丑張浚還自高郵復命知樞密院事是月翟興擊殺楊進餘黨復推其徒劉可拒官軍六月戊申朔以東京

留守杜充引兵赴行在命兼宣撫處置副使節制淮南南京東西路己酉以久雨召郎官已上言闕政呂頤浩請令實封以聞遂用司勳員外郎趙鼎言罷王安石配饗神宗廟庭以司馬光配王善攻淮寧府不克轉寇宿州統領王冠戰敗之甲寅罷賞功司乙卯命恤死事者家且錄其後升浙西安撫使康允之爲制置使丙辰劉光世招安苗傅將韓侂戊午命江浙淮南引塘濶開畝澮以阻金兵庚申皇太后至建康府辛酉以久陰下詔以四失罪己一曰昧經邦之大略二曰昧戡難之遠圖三曰無綏人之德四曰失馭臣

之柄仍榜朝堂徧諭天下使知朕悔過之意以帶御器械李質權同主管殿前司乙丑以建康府路安撫使連南天兼建康府宣徽太平等州制置使丁卯右司諫袁植請誅黃潛善及失守者權邦彥等九人詔朕方念咎責已豈可盡以過失歸於臣下遂罷植知池州以趙鼎爲右司諫癸酉置樞密院檢詳官以右侍郎中劉寧止爲沿江措置副使甲戌移御行宮乙亥詔諭中外以迫近防秋請太后率宗室迎奉神主如江表百司庶府非軍旅之事者並令從行朕與輔臣宿將備禦寇敵應接中原官吏士民家屬南去者有

司毋禁金人陷磁州是夜賊貴仲正降秋七月戊寅贈王復爲資政殿學士己卯親慮囚辛巳苗傅劉正彥伏誅癸未進韓世忠檢校少保武勝昭慶軍節度使御營使司都統制范瓊自洪州入朝以瓊爲御營使司提舉一行事務後軍統制辛企宗爲都統制命學士院草夏國書大金國表本付張浚甲申詔以苗劉之變當由大臣不能身衛社稷朱勝非顏岐路允迪並落職張澂衡州居住以知廬州胡舜陟爲淮西制置使知江州權邦彥兼本路制置使金人犯山東安撫使劉洪道棄濰州遁萊州守將張成舉城降丁

亥以范瓊跋扈無狀收下大理獄分其兵隸神武五軍皇太子薨謚元懿戊子鄭穀薨己丑以資政殿大學士王絢參知政事兵部尚書周望同簽書樞密院事庚寅仙井監鄉貢進士李時雨上書乞選立宗子係屬人心帝怒斥還鄉里辛卯升杭州爲臨安府壬辰言者又論范瓊逼遷徽宗及迎立張邦昌瓊辭伏賜死子弟皆流嶺南劉洪道復青州執金守向大猷乙未遣謝亮使夏國丁酉遣崔縱使金軍前庚子張浚發行在辛丑王瓌與靳賽遇合戰敗績壬寅命李邴滕康權知三省樞密院事扈從太后如洪州楊惟

忠將兵萬人以衛以杜充同知樞密院事兼宣撫處置副使乙巳詔江西閩廣荆湖諸路團教峒丁槍杖手山東賊郭仲威陷淮陽軍翟興引兵入汝州與賊王俊戰敗之八月己酉移浙西安撫司于鎮江府庚戌李邴罷壬子以吏部尚書劉珪爲端明殿學士權同知三省樞密院事甲寅王庶罷以徽猷閣直學士知慶陽府王似爲陝西節制使劉文舜入舒州己未太后發建康丁卯遣杜時亮使金軍前閏八月丁丑朔以胡舜陟爲沿江都制置使集英殿修撰王義叔副之丁亥輔達掠漣水軍殺軍使郝璘率衆降于王

瓌已丑以呂頤浩守尚書左僕射杜充守右僕射並同中書門下平章事庚寅起居郎胡寅上書言二十事呂頤浩不悅罷之辛卯命杜充兼江淮宣撫使守建康前軍統制王瓌隸之韓世忠爲浙西制置使守鎮江劉光世爲江東宣撫使守太平池州並受充節制丁酉太后至洪州已亥減福建廣南歲上供銀三之一詔制置使唯用兵聽便宜餘事悉禁壬寅帝發建康庚復還浙西張俊辛企宗以其軍從甲辰次鎮江府賜陳東家金張浚次襄陽招官軍義兵分屯襄郢唐鄧以程千秋李允文節制是月知濟南府宮儀及金人數戰于密州兵潰儀及劉洪道俱奔淮南守將李逵以密州降金靳賽詣劉光世降九月丙十朔日有食之諜報金人治舟師將由海道窺江浙遣韓世忠控守圖山福山辛亥次平江府壬子金人陷單州興仁府遂陷南京執守臣凌唐佐降之癸丑以周望爲兩浙荆湖等路宣撫使總兵守平江翰林學士張守同簽書樞密院事命劉光世移屯江州丙辰遣張邵等充金國軍前通問使金人陷沂州却高麗入貢使張浚承制罷知潭州辛炳起復直龍圖閣向子諲代之丁巳蠲諸路青苗積欠錢辛酉知鼎州邢侗坐結

耶律余覲再責汝州團練副使英州安置癸亥賜宿  
泗州都大提舉使李成軍絹二萬匹成尋復叛己巳  
以胡舜陟爲宣撫司參謀官知鎮江府陳邦光爲沿  
江都制置使庚午以工部侍郎湯東野知平江府兼  
浙西制置使辛未追復鄒浩龍圖閣待制壬申夜潭  
州禁卒作亂謀竄不果向子諲隨招安之甲戌金帥  
婁宿犯長安經略使郭琰棄城遁河北賊酈瓊圍光  
州冬十月丙子朔詔按察官歲上所發擿賊吏姓名  
以爲殿最庚辰禁諸軍擅入川陝癸未帝至杭州復  
如浙東庚寅渡浙江郭仲威詣周望降望以仲威爲

本司統制辛卯李成陷滁州殺守臣向子伋壬辰帝  
至越州癸巳命提舉廣西峒丁李穡市馬邕州置牧  
養務戊戌初命東南八路歲收經制五項錢輸行在  
張浚治兵于興元府金人陷壽春府庚子陷黃州守  
臣趙令晟死之辛丑張浚以同主管川峽茶馬趙開  
爲隨軍轉運使專總四川財賦金人自黃州濟江劉  
光世引軍遁知江州韓紹棄城去金人自大冶縣趨  
洪州是月京西賊劉滿陷信陽軍殺守臣趙士負盜  
入宿州殺通判盛緒己十一月乙巳朔金人犯廬州  
守臣李會以城降王善叛降金金人執之丁未詔降

雜犯死罪釋流以下囚聽李綱自便追復宋齊愈官  
貴仲正犯荆南兵馬鈐轄渠成與戰斬之戊申金帥  
兀朮犯和州守臣李儔以城降通判唐璟死之己酉  
張浚出行關陝兀朮陷無爲軍守臣李知幾棄城走  
壬子太后退保慶州江西制置使王子獻棄洪州走  
丁巳金人陷臨江軍守臣吳將之遁戊午遣孫悟等  
充金國軍前致書使金人陷洪州權知州事李績中  
以城降撫袁二州守臣王仲山王仲疑皆降淮賊劉  
忠犯蘄州韓世清逆戰破之忠入舒州殺通判孫知  
徽庚申金人陷真州守臣向子志棄城去辛酉太后

至吉州壬戌金人犯建康府陷溧水縣尉潘振死之  
癸亥金人陷太平州主管步軍司間勅自西京奉累  
朝御容至行在詔奉安于天慶觀尋命勅節制淮西  
軍馬以拒金人甲子杜充遣都統制陳淬岳飛等及  
金人戰于馬家渡王瓌以軍先遁淬敗績死之乙丑  
以檢正諸房公事傅崧卿爲浙東防遏使太后發吉  
州次太和縣護衛統制杜彥及後軍楊世雄率衆叛  
犯永豐縣知縣事趙訓之死之金人至太和縣太后  
自萬安陸行如虔州丁卯下詔回浙西迎敵金人犯  
吉州守臣楊淵棄城走又陷六安軍己巳帝發越州



宋史本紀卷三十五 二十一  
次錢清鎮庚午復還越州以周望同知樞密院事仍兼兩浙宣撫使守平江殿前都指揮使郭仲荀爲副使守越州右軍都統制張俊爲浙東制置使從行御史中丞范宗尹參知政事辛未兀术入建康府守臣陳邦光戶部尚書李稅迎拜通判楊邦義拒之癸酉帝如明州金人犯建昌軍兵馬監押蔡延世擊却之甲戌兀术殺楊邦義韓世忠自鎮江引兵之江陰軍江淮宣撫司潰卒李選攻陷鎮江淮西兵馬都監王宗望以濠州降于金是月張浚至泰州桑仲自唐州犯襄陽京西制置使程千秋拜走仲遂據襄陽十二

月乙亥朔張浚承制廢積石軍丙子帝至明州丁丑江淮宣撫司準備將戚方擁衆叛犯鎮江府殺守臣胡唐老辛巳金人陷常州守臣周杞遣赤心隊官劉晏擊走之陷廣德軍殺守臣周烈劉光世引兵趨南康軍壬午定議航海避兵禁卒張寶等憚行謀亂命呂頤浩等伏兵執寶等十七人斬之甲申張浚承制拜涇原經略使曲端爲威武大將軍宣撫處置使司都統制乙酉兀术犯臨安府守臣康允之棄城走錢塘縣令朱蹕死之己丑帝乘樓船次定海縣給行在諸軍雪寒錢辛卯留范宗尹趙鼎于明州以候金使

癸巳帝次昌國縣乙未杜彥犯潭州殺通判孟彥卿  
趙民彥金人屠洪州戊戌金人犯越州安撫使李鄴  
以城降衛士唐琦袖巨石要擊金帥琶八不克死之  
郭仲荀棄軍奔温州庚子移幸温合癸卯黃潛善卒  
于英州李成自滁州引兵之淮西

本紀卷第二十五

本紀卷第二十六

宋史二十六

開府儀同三司上柱國錄軍國書前中書右丞相樞密使領經筵事都督張瑄等奏  
勅修

高宗三

四年春正月甲辰朔御舟碇海中乙巳金人犯明州  
張俊乃守臣劉洪道擊却之丙午帝次台州章安鎮  
己酉遣小校自海道如處州問安太后庚戌金人再  
犯明州張俊引兵去浙東副總管張思政及劉洪道  
繼遁癸丑貶郭仲荀汝州團練副使廣州安置丙辰  
詔原兩浙州郡降金官吏丁巳婁宿陷陝州守臣李

彥仙死之己未金人陷明州夜大雨震電乘勝破定  
海以舟師來襲御舟張公裕以大船擊退之辛酉養  
章安鎮壬戌雷雨又作甲子伯溫州港口乙丑以中  
書舍人李正民為兩浙湖南江西撫諭使詣太后問  
安丁卯台州守臣晁公為棄城遁處州衛兵及鄉兵  
相殺縱火肆掠三日劉可轉寇京西屢為桑仲所敗  
至是為其黨所殺復推劉超據荆門軍戊辰滕康劉  
瑄罷仍奪職己巳換給僧道度牒人輸錢十千辛未  
命臣僚條具兵退之後措置之策駐蹕之所是月金  
人攻楚州守臣趙立拒之金人犯邠州曲端遣涇原

路副總管吳玠拒戰敗之于彭原又陷同州張浚承  
謝亮使夏國至則其主乾順已稱制遂還二月甲戌  
朔鄴瓊率眾降于劉光世叛將傅選詣處州乞降乙  
亥奉安祖宗神御于福州詔復以盧益為資政殿學  
士李回端明殿學士並權知二省樞密院事金人陷  
潭州將吏王暎劉价趙聿之戰死向子諲率兵奪門  
亡去金兵大掠屠其城丙子金人自明州引兵還臨  
安癸未處州鄉兵首領陳新率眾數萬圍城叛將胡  
友亦犯處州與新戰破之新乃去甲申禁迓卒投刺  
別軍丙戌金人自臨安退兵命劉光世率兵追之丁

宋史本紀卷二十六 二  
亥金人陷汴京權留守上官悟出奔爲盜所殺庚寅  
帝次温州浙東防遏使傅崧卿入越州辛卯金人陷  
秀州甲午知蔡州程昌寓棄城南歸鼎州民鍾相作  
亂自稱楚王乙未杜充罷丙申以金兵退肆赦張浚  
承制以陝西制置使王似知成都府罷諸路武臣提  
點刑獄李成入舒州金游騎至平江周望奔太湖守  
臣湯東野亦遁茶陵縣軍賊二千餘人犯郴州永興  
縣戊戌金人入平江縱兵焚掠辛丑白虹貫日鍾相  
陷澧州殺守臣黃宗權湖北荆置使傅雱招諭孔彥  
舟彥舟聽命因以爲湖南北捉殺使荆南守臣唐慤

棄城去金人陷醴州守臣王淑棄城去是月張浚自  
秦州引兵入援三月癸卯朔孔彥舟入鼎州金人去  
平江統制陳思恭以舟師邀敗其後軍于太湖呂頤  
浩請幸浙西丙午趙鼎言金兵去未遠遂緩其行丁  
未命發運司說諭兩浙富民助米以備巡幸辛亥遣  
兵部員外郎馮康國等撫諭荆湖南北廣南諸路壬  
子金人入常州守臣周杞棄城去甲寅遣盧益及御  
營都統制辛企宗奉迎太后東遷丙辰金人犯終南  
縣經略使鄭恩戰敗死之丁巳金人至鎮江府韓世  
忠屯焦山寺邀擊之詔侍從官各舉可充監司者一

二人辛酉御舟發温州宣撫司節制軍馬季允文部  
兵至鄂州御營前軍將楊勅叛甲子張浚請便宜辟  
官不許衝改戊辰孔彥舟擊敗鍾相禽相及其子子  
昂檻送行在巳巳戚方陷廣德軍殺權通判王儔夏  
四月癸酉蠲江西州縣兵盜殘破民家夏稅戊寅吳  
玠及金人戰于邠州彭原店敗績部將楊晟死之巳  
卯以觀文殿學士朱勝非爲江西湖南北宣撫使是  
日張浚引兵至房州知金兵退乃還癸未帝駐越州  
甲申下詔親征巡幸浙西韓世忠駐軍揚子江要金  
人歸路屢敗之兀朮引軍走建康乙酉以御史中丞

趙鼎爲翰林學士鼎固辭不拜戚方圍宣州劉光世  
遣統制王德誘誅劉文舜于饒州丙申用趙鼎劾奏  
呂頤浩罷爲鎮南軍節度使醴泉觀使命三省樞密  
院同班奏事韓世忠及兀朮再戰江中金人乘風縱  
火世忠敗績兀朮渡江屯六合縣丁酉復以趙鼎爲  
御史中丞戊戌振明州被兵民家巳亥以張浚爲浙  
西江東判置使辛丑王德破妖賊王宗石于信州貴  
溪縣執其渠帥諸縣悉平是月金人犯江西者自荆  
門軍北歸留守司同統制牛皐潛軍寶豐擊敗之五  
月甲辰以范宗尹爲尚書右僕射兼御營使辛亥統

領赤心隊軍馬劉晏及戚方戰于宣州敗死壬子金人焚建康府執李枕陳邦光而去淮南宣撫司統制岳飛邀擊于靜安鎮敗之是夜紫微垣內有赤雲亘天白氣貫其中癸丑詔臺諫等官各舉所知二人以張守參知政事趙鼎僉書樞密院事以白金三萬兩賜韓世忠軍贈戰歿將孫世詢嚴永吉張淵等官甲寅金人陷定遠縣執閻勅去勅不屈死之巨師古擊戚方于宣州數敗之方引去乙卯王綯罷丁巳命劉光世移軍捕戚方楊勅犯婺州戊午復置權尚書六部侍郎癸亥詔中原淮南流寓士人聽所在州郡附

試甲子周望罷尋分司衡州居住置京畿淮南湖北京東西路鎮撫使乙丑升高郵軍爲承州以翟興孟汝趙立劉位趙霖李成吳翊李彥先薛慶並爲鎮撫使興河南府汝唐州立楚泗州漣水軍位滁濠州霖和州無爲軍成舒靳翊光黃州彥先海州淮陽軍慶承州天長軍丁卯慶及金人戰于承州城下累敗之戊辰命江浙州縣祭戰死兵民分江東西爲鄂州江州池州三路置安撫使罷諸路帥臣兼制置使諸州守巨兼管內安撫使是月劉超據荆南分兵犯峽州又合叛將彭筠犯復州淮西敗將崔增陷焦湖水砦

河東北經制使王俊舉兵及金人戰于襄城縣敗之  
復潁昌府張浚承制以金房州隸利路六月辛未朔  
蠲紹興府三縣湖田米詔侍從臺諫諸將集議駐蹕  
事宜楊勅犯處州癸酉遣統制陳思恭討勅合江南  
兩路轉運爲都轉運使司貶周望昭化軍節度副使  
連州安置甲戌罷御營司以范宗尹兼知樞密院事  
乙亥王瓌遣統領林閏等追襲楊勅于東陽縣軍敗  
碑將李在死之丁丑以劉光世部兵爲御前巡衛軍  
光世爲都統制楊勅等楚建州戚方犯湖州安吉縣  
詔張俊捕之戊寅更御前五軍爲神武軍御營五軍

爲神武副軍以知建康府權邦彥爲淮南等路制置  
發運使滁濠鎮撫使劉位爲賊張文孝所殺命其子  
綱襲職庚辰置鎮撫使六人陳規德安府復州漢陽  
軍解潛荆南府歸陝州荆門公安軍程昌寓鼎澧州  
陳求道襄陽府鄧隨郢州范之才金筠房州馮長寧  
淮寧順昌府蔡州辛巳慮囚中命有司討論釐正崇  
寧以來濫賞罷諸州添差通判職官癸未召劉光世  
赴行在甲申岳飛破戚方于廣德軍乙酉鍾相僞將  
胡源引兵入慈利縣執其黨陳誠來降丙戌以呂頤  
浩爲建康路安撫大使劉光世爲兩浙路安撫大使

朱勝非爲江州路安撫大使郭仲威爲真揚州鎮撫使戚方詣張俊降庚寅召韓世忠率兵赴行在辛卯妖賊王宗石等伏誅壬辰權密州都巡檢徐文率部兵泛海來歸甲午置樞密院幹辦官四員乙未郭仲威犯鎮江府遣岳飛擊之是月兀朮聞張浚在秦州將舉兵北伐自六合引兵趨陝西秋七月癸卯劉光世援宣撫使例乞便宜行事不許詔軍興以來諸州得便宜指揮者並罷乙巳馮長寧復順昌府張浚罷曲端都統制丁未以劉光世爲集慶軍節度使開府儀同三司戊申以孔彥舟爲辰元靖州鎮撫使張浚

獻黃金萬兩助軍用宣撫司遣統制官呂世存王俊復鄜州其餘州縣多迎降後軍將王闢叛陷歸州鈐轄田祐恭擊敗之己酉王闢犯房州守臣韋知幾棄城走庚戌楊勅受劉光世招安尋復叛去迫泉州癸丑崔增犯太平州守臣郭偉拒却之乙卯金人徙二帝自韓州之五國城劉光世乞移司平江不許丙辰張俊合諸將戚方等兵萬餘赴行在丁巳申命元祐黨人子孫于州郡自陳盡還當得恩數韓世忠張俊並罷己未禁閩廣淮浙海舶商販山東慮爲金人鄉導詔江浙福建州縣諭豪右募民兵據險立柵防遏



外寇庚申以岳飛爲通泰州鎮撫使辛酉建州民范  
汝爲作亂命統制李捧捕之乙丑復李邦彥以下十  
九人官職聽自便復李綱銀青光祿大夫許翰顏岐  
端明殿學士張俊貶曲端階州居住丁卯金人立劉  
豫爲帝國號齊戊辰罷提領措置茶鹽司己巳詔王  
瓌部兵屯信州程昌寓遣將杜湛禽李合戎于松滋  
縣是月張用據漢陽軍沿江措置副使李允文招降  
之以便宜徙鄂州路副總管以右軍統制馬友知漢  
陽軍八月辛未朔以禮部尚書謝克家參知政事上  
申李成請降于江州詔撫納之張浚亭程千秋官文

州編管癸酉選神武中軍親兵六百人番直禁中甲  
戌詔侍從官日一員輪直進故事關治體者丁丑以  
韓世忠爲檢校少師武成感德軍節度使張俊檢校  
少保寧武昭慶軍節度使贈監察御史常安民爲左  
司諫江公望左諫議大夫錄其後二人庚辰太后至  
自虔州薛慶及金人戰于揚州城下死之郭仲威奔  
興化縣辛巳侍御史沈與求戶部侍郎李陵以論宰  
相范宗尹皆黜宗尹復視事癸未盧益罷張浚復永  
興軍再貶曲端海州團練使萬州安置甲申陳萬信  
餘黨雷進作亂乙酉焚慈利石門二縣以御營司叅

議官王擇仁權河東制置使山砦首領韋忠佺爲都  
統制宋用臣馮賽同都統制丙戌命李成吳翊捍禦  
上流翊棄城去以成爲四州鎮撫使命李捧便道過  
信州招捕靳賽戊子以饒信妖賊平赦三州徒以下  
囚蠲民今年役錢貶滕康永州劉珪衡州並居住已  
丑詔岳飛救楚州仍命劉光世遣兵往援辛卯杜湛  
渡江討羣賊復石首等五縣壬辰盜入梅州殺守臣  
沈同之大掠而去癸巳命福建安撫使程邁會兵討  
范汝爲甲午知虢州紹興遣統制閻興及金人戰于  
解州東屢破之金人陷承州命陳思恭屯兵明州以

防海道劉光世遣王德酈瓊以輕兵渡江乙未遇金  
游騎于召伯埭敗之戊戌以桑仲爲襄陽鄧隨郢州  
鎮撫 又是月罷提舉廣西峒丁孔彥舟入潭州宣撫  
司叅 戡官王以寧率兵拒之以寧敗遁去宣撫司主  
管機宜文字傅雱在彥舟軍中承制以彥舟權湖南  
副總管劉綱以乏食率兵奔溧陽九月辛丑呂頤浩  
入見請益兵命王瓌巨師古顏孝恭兵隸之分屯境  
內壬寅詔諸路決囚甲辰徽宗皇后鄭氏崩于五國  
城戊申命秦鳳將關師古領兵赴行在劉豫僭位于  
北京庚戌禁宣撫司僚屬便宜行事及京西湖南北

路勿隸川陝宣撫司節制癸丑涇原同統制李彥琦  
及金人戰于洛河車渡敗之乙卯罷中書門下省檢  
正官桑仲陷均房州進犯白土關丙辰復增左右司  
郎官爲四員金人攻楚州趙立死之丁巳趙霖復和  
州李成遣馬進犯興國軍戊午荆襄賊趙延壽犯德  
安府陳規拒却之己未金均房安撫使王彥及桑仲  
戰于平麗縣敗之王闢詣彥降辛酉李捧擊范汝爲  
于建州官軍皆潰捧遁去金人犯揚州統制靳賽逆  
戰于港河敗之金人陷延安府執呂世存又陷保安  
軍癸亥張浚遣都統制劉錫統五路兵及金將婁宿

戰于富平縣浚駐邠州督戰官軍敗績丙寅給劉光  
世犒軍銀二萬兩絹二萬匹戊辰趙延壽焚郢州金  
人陷楚州鎮撫使李彥先來救兵敗死之冬十月庚  
午朔張浚斬環慶經略使趙哲于邠州貶劉錫合州  
安置命諸將各領兵歸本路浚退保秦州陝西大震  
辛未秦檜自楚州金將撻懶軍中歸于漣水軍丁禩  
水砦壬申命楊惟忠王瓌討李成丙子以孔彥舟爲  
鼎澧辰沅靖州鎮撫使戊寅鍾相餘黨楊華舉兵圍  
桃源縣己卯馬進犯江州癸未程昌寓入鼎州擊楊  
華破之甲申趣劉光世救楚州丁亥以李回同知樞

密院事庚寅遣前御史臺檢法官謝嚮招范汝為召  
張浚以兵入援追復李邦彥觀文殿大學士辛卯虔  
州賊李敦仁及弟世雄舉兵破處州石城縣甲午命  
楊惟忠率兵屯江州乙未岳飛破金人于承州丙申  
詔劉光世節制諸鎮守禦通泰州伺便襲金人過淮  
是月馮長寧棄城去尋以淮寧附劉豫江東賊張琪  
犯建康府劉洪道招降之環慶路統制慕洵叛附于  
夏國汪原統制張中彥經略司幹辦趙彬叛降金人  
劉忠據岳州平江縣白面山王善餘黨祝友擁衆為  
亂屯滁州龔家城十一月癸卯慕洵遂引金人圍環

州呂頤浩復南康軍甲辰趙鼎罷乙巳秦檜入見丙  
午岳飛棄秦州渡江丁未金人犯秦州飛退保江陰  
軍沙上以御史中丞富直柔僉書樞密院事秦檜為  
禮部尚書李允文殺岳州守臣袁植呂頤浩會楊惟  
忠與馬進戰南康軍不利戊申頤浩遣巨師古救江  
州為進所敗師古奔洪州金人陷涇原經略使劉錡  
退屯瓦亭己酉以孔彥舟為湖南副總管部兵屯潭  
州庚戌命神武副軍都統制辛企宗討范汝為壬子  
日南至率百官遙拜二帝乙卯改樞密院幹辦官為  
計議官丙辰金人陷秦州丁巳通州守臣呂伸棄城

去王彥攻桑仲于黃水破之房州平張浚以彥為金均房州鎮撫使崔增犯池州劉洪道遣統制李貴擊走之增以兵萬餘詣呂頤浩降甲子詔諸路守臣節制管內軍馬丙寅金房州賊郭希犯歸州田祐恭擊卻之命王瓌部兵萬人速援呂頤浩祝友渡江大掠是月張浚退軍興州秦鳳副總管吳玠收餘兵保大散關東和尚原詔諸路轉運司括借寺觀田租蘆場三年十二月庚午安南請入貢卻之辛未遣度支員外郎韓球括饒信諸州錢糧凡江湖川廣上供皆拘之壬申命孔彥舟援江州丙子禁節制軍馬守臣便

宜行事丁丑馬進分兵犯洪州乙丑李敦仁犯撫州崇仁縣命李山張中彥討之壬辰金人犯熙州總管劉惟輔戰敗之殺五千餘人甲午再犯熙州惟輔軍潰被執死之乙未以張俊為江南招討使討李成丁酉范汝為降詔補民兵統領是月張俊承制復海州團練副使曲端左武大夫興州居住是歲宣撫處置司始令四川民歲輸激賞絹三十三萬匹有奇紹興元年春正月己亥朔帝在越州帥百官遙拜二帝不受朝賀下詔改元釋流以下囚復贖良方正直言極諫科蠲兩浙夏稅和買紬絹絲綿減閩中上供

銀三分之一戊申改命張俊為江淮路招討使復江池路為江東西路分荆湖江南諸州為荆湖東西路置安撫司治池江鄂鼎州江南東西路各置轉運司荆湖東西路轉運司通掌兩路財賦以呂頤浩為江東路安撫大使朱勝非江西路安撫大使馬進陷江州守臣姚舜明棄城走端明殿學士王易簡等二百人皆遇害已酉岳飛引兵之洪州金人犯揚州謝嚮率范汝為討平建陽賊劉時舉金人犯秦州吳玠擊敗之庚戌又犯西寧州守臣俱重迎降辛亥謝克家罷壬子詔京官知縣並堂除內外侍從各舉可任縣

令者二人犯贓連坐自今不歷縣令者勿除監司郎官不歷外任者勿除侍從著為令張中孚以原州叛降于金癸丑李敦仁圍建昌軍蔡延世率鄉兵擊退之賊曹成入漢陽軍李允文招之成入鄂州復趨江西丁巳呂頤浩遣王夔崔增擊賊于湖口大敗之頤浩及楊惟忠引兵趨江州辛酉詔太祖創業垂統德被萬世神宗詔封子孫一人為安定郡王世世勿絕自宣和末至今未舉有司其上應襲封人名依故事舉行金人再圍環州是月張浚復曲端榮州刺史提舉江州太平觀閬州居住尋移恭州二月戊辰朔宜

章縣民李冬至二作亂犯英連韶郴諸州祝友降劉  
光世分其軍以友知楚州庚午改行宮禁衛所爲行  
在皇城司李成黨邵友犯筠州守臣王庭秀棄城去  
辛未犯臨江軍守臣康倬遁壬申初定歲祀天地社  
稷如奏告之禮癸酉桑仲棗陽引兵還襄陽丁丑  
鄜延將李永琦叛犯慶陽府戊寅禁州郡統兵官擅  
招安亂軍盜賊已卯日中有黑子四日乃沒以辛企  
宗爲福建制置使辛巳以秦檜叅知政事壬午水賊  
張榮入通州癸未詔辛企宗及謝嚮罷遣范汝爲兵  
汝爲不聽命甲申詔王瓌張俊倚角討捕馬進等賊

丙戌復置秘書省己丑命孔彥舟呂頤浩張俊會兵  
討李成壬辰雨雹癸巳邵青寇宣州丙申詔諸路提  
刑司以八月類省試張浚亦以便宜合川陝舉人卽  
置司類省試丁酉宣教郎范壽坐誣訟孟忠厚且及  
太后除名湖州編管是月李敦仁犯汀州馬友遣其  
黨犯鄂州總管張用拒邵之李允文以友權湖南招  
捉公事友大掠漢陽而去過岳州守臣吳錫遁友據  
之三月戊戌朔以嚴衢二州守臣柳約李處勵有治  
効各進職一等呂頤浩遣崔增王瓌合兵擊李成于  
湖口大敗之庚子張浚以富平之敗上疏待罪詔免

壬寅禁諸路過糴丙午張俊楊沂中岳飛渡江擊馬  
進大敗之孔彥舟焚掠潭州趨衡州己酉李成犯饒  
州庚戌張俊楊沂中復擊馬進于筠河敗之復筠州  
進奔江州男子崔紹祖詐稱越王中子受上皇詔爲  
天下兵馬大元帥趙霖以聞辛亥詔赴行在命劉光  
世兼淮南京東路宣撫使治揚州經畫屯田光世迄  
不行甲寅罷諸州免行錢乙卯金人破階州庚申劉  
超犯澧州統制杜湛率兵拒之甲子始下詔罪李成  
募人禽斬赦脅徙者張俊追馬進至江州進戰敗遁  
去乙丑進復江州楊沂中趙密引兵追擊進又大敗

之成奔蘄州振淮南京東西流民荆湖東路安撫使  
向子諲說降馬友與共討李冬至二平之是月金人  
攻張榮縮頭湖水砦榮擊敗之來告捷劉光世以榮  
知泰州金人迫興州張浚退保閬州以端明殿學士  
張深爲四川制置使及叅議軍事劉子羽趨益昌叅  
謀官王庶爲龍圖閣待制知興元府兼利夔兩路制  
置使節制陝西諸路桑仲以其黨李道知隨州夏四  
月乙巳張浚承制分利閬劔文政五州爲利州路置  
經略安撫使庚午張琪復叛犯當塗縣金將撻懶渡  
淮屯宿遷縣馬樂湖壬申太白晝見乙亥劉光世復



楚州階州統領杜肇復階州馬友引兵入潭州戊寅  
杜琪棄澧州劉超入據之己卯金涇原帥趙彬犯耀  
州守臣趙澄擊走之淮賊寇宏犯濠州庚辰隆祐皇  
太后崩癸未桑仲陷鄧州守將譚充棄城走河東招  
捉使王俊引兵來援仲執斬之以其黨李橫知州事  
乙酉爲太后制暮年服辛卯群臣三上表始聽政癸  
巳命向子諲發兵及廣西安撫許中同扼險要防孔  
彥舟入廣仍許脅從自新以招諭之是月京西賊李  
忠陷商州守臣楊伯孫棄城走呂頤浩遣統制閻臯  
通判建昌軍蔡延世襲擊李敦仁禽其弟世雄世臣

五月丙辰朝謁江西路被賊州縣賦稅丁酉詔呂頤  
浩朱勝非劉光世並兼淮南諸州宣撫使始奪李成  
官戊戌以張用爲舒蘄鎮撫使癸卯作大宋中興寶  
成金人犯和尚原吳玠擊敗之丙午初復詔試館職  
之制劉光世遣統制王德襲揚州執郭仲威以獻伏  
誅辛亥水軍統制邵青叛圍太平州趙彬及金人合  
兵圍慶陽府守臣楊可昇擊敗之甲寅命知南外宗  
正事令廣選年幼宗子將育于宮中詔收耆戶長役  
錢已未詔州縣因軍期徵取民財物者立式榜示禁  
過數催擾庚申孔彥舟引衆過潭州馬友迎擊大敗

之彥舟趨岳州犯鄂州李允文以彥舟為湖東副總  
管屯漢陽辛酉以直秘閣宗綱為荆南鎮撫司措置  
營田官樊賓為副壬戌劉光世招降邵青趙延壽據  
分寧縣呂頤浩招降之是月張俊及李成戰于黃梅  
縣殺馬進成敗遁歸劉豫李忠譚兗各率兵歸張浚  
浚命王庶分其兵張用復叛寇江西岳飛招降之湖  
州進士吳木上書論宰執送徽州編管六月己巳始  
鬻承直修武郎以下官壬申冊謚皇太后曰昭慈獻  
烈甲戌張琪犯餘杭州又犯宣州乙亥月犯心庚辰  
湖賊楊華楊廣犯鼎州程昌寓拒邵之上虞縣丞婁

寅亮上書請選立繼嗣壬午權橫昭慈獻烈皇后于  
越州張琪犯徽州守臣郭東棄城去琪入據之癸未  
張浚引大兵至瑞昌縣之丁家洲李允文自鄂部兵  
歸浚浚并其兵護允文赴行在邵青率舟師至鎮江  
甲戌復叛去丁亥崇安民廖公昭合范汝為餘黨熊  
志寧作亂眾既散志寧復與建陽民丁朝佐合兵陷  
二縣戊子慮囚己丑邵青犯江陰軍之福山遣海州  
鎮撫使李進彥中軍統制耿進率舟師會劉光世討  
之南安賊吳忠宋破壇劉洞天作亂庚寅江西提刑  
司遣官討之破壇洞天皆伏誅忠遁去癸巳熙河統

制關師古洮東安撫郭玠同討熙州叛兵連敗之甲午廣賊鄧慶龔富圍南雍州守臣鄭成之率兵民以拒蠲建劔汀州邵武軍租是月知虢州邵興屯盧氏縣爲河南統制董先所破走興元先遂取商虢二州張浚承制以吳玠爲陝西諸路都統制時關隴六路盡陷止餘階成岷鳳洮五郡鳳翔之和尚原隴州之方山原黏罕旣得陝西地悉與僞齊秋七月乙未朔以馬友權荆湖東路副總管趣討孔彥舟統制潘逵後軍將胡江等叛破玉山弋陽永豐三縣遣樞密使準備將領徐文討之戊戌吳錫復入邵州庚子以岳

飛爲神武右副軍統制留軍洪州彈壓盜賊辛丑封伯右武衛大將軍令話爲安定郡王壬寅虔州賊陳顥作亂命趣捕之甲辰詔秘書省長貳通修日曆丙午劉光世遣將喬仲福擊邵青于常熟爲所敗捷懶自宿遷北歸戊申韓世清追襲張琪復祁門縣庚戌張浚執傅雱赴行在張浚以曲端屬吏以武臣康隨提點夔路刑獄與王庶雜治之辛酉詔呂頤浩赴行在張琪犯饒州頤浩遣閻臯擊敗之琪黨姚興降琪走徽州癸亥范宗尹罷是月珍州守臣李玠棄城去王彥數擊敗李忠趙彬來歸張浚承制以彬爲陝西

轉運使又以涇原兵馬都監李彥琪爲本路副總管  
彥琪尋叛去八月丙寅以孔彥舟爲蘄黃鎮撫使丁  
卯以知潭州吳敏爲荆湖東西廣南路宣撫使張浚  
殺曲端于恭州獄張用部兵至瑞昌歸張浚浚以用  
爲本軍統制戊辰張守等上紹興重修敕令格式癸  
酉復以汪伯彥爲江東安撫大使乙亥呂頤浩遣將  
李鑄復舒州丁丑祔昭慈獻烈皇后神主于温州太  
廟戊寅張守罷以李回參知政事富直柔同知樞密  
院事庚辰杜湛及劉超戰于彭山爲所敗辛巳超及  
楊華楊廣合兵復寇鼎州程昌寓遣湛率舟師擊敗

之遣辛巳宗稜軍福州討熊志寧胡江等諸賊許世  
清及張琪戰世清敗琪復入祈門縣壬午命張俊遣  
兵捕之鑄紹興錢癸未詔許邵青張琪脅從從黨自  
新乙酉以李成在順昌恐復謀亂遣使齎蠟書諭淮  
寧蔡州將士立賞格募人禽斬成丁亥以秦檜爲尚  
書右僕射同中書門下平章事兼知樞密院事庚寅  
復李綱資政殿大學士募人往京東河南伺察金齋  
動止仍齎詔慰撫忠義保聚之人蔡州鎮撫使范福  
棄城去以上豪李祐代之辛卯蠲徽州被賊民家夏  
稅壬辰置三省樞密院賞功房是月知鄂州曹成揆

湖西犯沅州與知復州李宏合屯瀏陽旣而攻宏宏  
奔潭州九月甲午朔張琪黨李擢克宣州守臣李彥  
卿及韓世清擊却之詔江東西路安撫使復治建康  
府洪州以王瓌知池州楊惟忠知江州並兼管內安  
撫使率部兵赴官丙申斬李世臣己亥以資政殿學  
士葉夢得爲江南東路安撫大使兼壽春等六州宣  
撫使庚子張琪復陷宣州己乃遁去辛丑命王瓌討  
琪丁未詔歲再遣使省謁諸陵因撫問河南將士命  
馬友移屯鄂州庚戌命宗室右監門衛大將軍士芭  
朝饗温州太廟辛亥合祭天地于明堂太祖太宗並

配大赦罷諸州守臣節制軍馬錄用元符末上書人  
子孫癸丑復以呂頤浩爲尚書左僕射同中書門下  
平章事兼知樞密院事丁巳王彥破李忠于秦郊店  
忠奔歸劉豫戊午禁福建轉運司抑民出助軍錢落  
范宗尹觀文殿學士己未初措置河南諸鎮屯田以  
戶部尚書孟庾爲江東西湖東等路宣諭制置使辛  
酉詔四方有建策能還兩宮者實封以聞有劾者賞  
以王爵壬戌遣御史胡世將督捕福建盜賊是月長  
星見冬十月乙丑詔蔡京王黼門人實有才能者公  
舉叙擢李回罷丙寅朱勝非分司江州居住丁卯以

李允文恣睢專殺賜死大理獄已巳王德招邵青降之庚午以孟庾叅知政事徽猶閣直學士湯東野爲江淮發運使劉拱道招降李捧董旺壬申置行在大宗正司癸酉兀术攻和尚原吳玠及弟璘力戰大敗之兀术僅以身免丁丑增置諸路武尉戊寅以張俊爲太尉移屯婺州壬午初置見錢關子招人入中以給軍食范汝爲復叛入建州守臣王浚明棄城走辛企宗退屯福州甲申劉超請降以超守光州戊子崔紹祖伏誅詔邵青以舟師赴行在己丑升越州爲紹興府李成軍正李雱伏誅知承州王林禽張珙于楚

州檻送行在壬辰錄程頤孫易爲分寧令癸巳范汝爲犯邵武軍守臣吳必明統制李山率兵拒之衆潰退保光澤縣關師古復秦州獲郭振是月劉豫遣將王世冲寇廬州守臣王亨大破之斬世冲曹成及馬友戰于潭州成敗還攸縣王才遣將丁順圍濠州劉光世遣兵攻橫澗山順解圍去十一月乙未葉夢得至建康以詔招王才降之丙申遣內侍撫問孔彥舟桑仲丁酉榜諭福建江東羣盜赦其脅從者戊戌詔移蹕臨安以孟庾爲福建江西荆湖宣撫使神武左軍都統制韓世忠副之仍命械謝嚮陸棠赴行在己

亥以婁寅亮爲監察御史范汝爲犯光渾縣李山走  
信州辛丑續編紹典太常因革禮桑仲請正劉豫惡  
逆之罪詔進幸荆南乙巳以右司諫韓璜黨富直柔  
責監潯州稅張琪伏誅庚戌富直柔罷荆湘廣西宣  
撫使吳敏始受命置司柳州辛亥升康州爲德慶府  
壬子詔內外侍從各舉所知三人丙辰程昌寓遣杜  
湛擊楊華敗之命張浚遣使持詔招曹成以所部赴  
行在巳未楊華請降辛酉命吏部侍郎李光節制臨  
安府內外諸軍壬戌曹成犯安仁縣執安撫使向子  
謹進攻道州是月前知廓州李惟德以岷州來歸吳

玠始遣人通書夏國十二月乙丑吳敏罷丙寅復置  
樞密院都承旨范汝爲遣葉澈寇南劔州守臣張翥  
拒戰大破之巳巳遣吏部侍郎傅崧卿爲淮東宣諭  
使甲戌遣江東安撫司統制郝鼓顏孝恭討建昌軍  
賊乙亥辛企宗罷仍追三官率兵赴軍前自效丁丑  
蠲諸路在官積欠詔官戶名田過制者與民均科以  
岳飛爲神武副軍都統制部兵屯洪州曹成陷道州  
守臣向子志棄城走戊寅以慧出求直言增行在職  
事官職錢遣駕部員外郎李愿撫諭川陝巳卯詔兩  
浙分東西路置提點刑獄庚辰桑仲遣兵寇復州守

臣殂通棄城去辛巳復置廣西提舉茶鹽司知海州  
薛安靖殺偽都巡檢使王企中率軍民以城來歸增  
諸路酒錢以備軍費甲申知龍州范綜統制雷仲舉  
兵復水洛城己丑起復陝西都統制吳玠為鎮西軍  
節度使詔江西安撫司趣兵討捕吳忠是月劉豫遣  
將王彥克攻壽春府桑仲遣李橫復寇金州王彥拒  
戰於馬郎嶺大破之均州平蔡州褒信縣守手許約  
叛據光州隋州安撫孫注復洮州龔富等圍南劔州

本紀第二十六

本紀卷第二十七

宋史二十七

開禧儀同三司上柱國錄軍國重事前中書右丞相監修國史領經筵事都總裁脫脫  
勅

高宗四

二年春正月癸巳朔帝在紹興府率百官遙拜一帝  
不受朝賀甲午詔復置賢良方正直言極諫科道官  
賜楊邦又謚曰忠襄韓世忠圍建州丁酉蠲諸路元  
年逋稅庚子陝西叛將白常圍岷州關師古率兵破  
之辛丑韓世忠拔建州范汝為自焚死斬其二弟餘  
黨悉平壬寅帝發紹興曹成釋向子諲丙午帝至臨



安府壬子遣韓世清捕石陂賊癸丑以張俊檢校少  
保定國軍節度使劉豫遣兵犯伊陽縣翟興反其將  
李恭合擊敗之曹成犯彬州永興縣己未修臨安城  
辛酉遣內侍任源撫問張浚江西副總管楊惟忠以  
楊勅雖就招安復謀作亂誘誅之二月甲子楊華復  
叛擾鼎澧潭三州詔立賞禽捕首領赦貸脅從丙寅  
命劉光世將銳卒萬人屯揚州經理淮東庚午以李  
綱爲觀文殿學士湖廣宣撫使仍命岳飛率馬友李  
宏韓京吳錫等共討曹成諸盜甲戌以吏部尚書李  
光爲淮西招撫使王瓌副之乙亥雨雹丙子以施達謝

嚮陸棠黨范汝爲逵除名婺州編管嚮棠械赴行在  
俱道死丁丑分崔增李捧邵青趙延壽李振單德忠  
徐文所部兵爲七將名御前忠銳軍隸步軍司非樞  
密奉旨不許調遣減淮南營田歲租三之二俟三年  
復舊己卯劉光世入見同執政對內殿諭以進屯楊  
州光世迄不行庚辰詔監司避本貫壬午程昌寓遣  
杜湛募兵攻賊周倫破之甲申以工部員外郎滕茂  
實死節于代州贈龍圖閣直學士丙戌初置著作官  
二員脩日曆己丑復荆湖東西爲荆湖南北路南路  
治潭北路仍治鄂申禁福建路私有私造兵器是月

知商州董先叛入劉豫金人陷慶陽府執楊可昇降  
之三月壬辰朔命襄鄧鎮撫使桑仲收復陷沒諸郡  
仍命諸鎮撫使互相應援再貶徐秉哲惠州吳玠南  
雄州莫儔韶州並居住水賊翟進襲漢陽軍殺守臣  
趙令弒李光執韓世清于宣州以歸虔化縣賊李敦  
仁及其徒皆授官隸諸軍乙未復置江陰軍罷福建  
路武尉戊戌葉夢得罷以李光爲江東安撫大使兼  
滁濠等六州宣撫使罷江淮發運司桑仲如郢州調  
兵守將霍明以仲將謀逆殺之以其事聞庚子金人  
攻方山原陝西統制楊政援之金兵引去辛丑又犯

隴安縣吳璘等擊走之淮南營田副使王寔括閒田  
三萬頃給六軍耕種丙午復置中書門下省檢正官  
省樞密院檢詳官己酉以神武右軍中部統制楊沂  
中爲神武中軍統制癸丑河南鎮撫使翟興爲部將  
楊偉所殺甲寅金人復自水洛城來攻楊政等又敗  
之庚寅曹成寇賀州清水砦守城劉全棄城去是月  
知壽春府陳下及鈐轄陳寶等舉兵復順昌府尋引  
兵歸爲僞齊所逐并壽春失之夏四月甲子曹成陷  
賀州陳顥圍循州焚龍川縣命江西安撫司遣將捕  
之丙寅賜禮部進士張九成以下二百五十九人及

第出身庚午以翰林學士承旨翟汝文參知政事壬申釋福建諸州雜犯死罪以下囚江西軍賊趙進寇瑞昌縣楊惟忠討降之戊寅僞齊統領王資率兵來歸富順監男子李勃僞稱徐王召赴行在壬午詔內外侍從監司守臣各舉中原流寓士大夫三二人以備任使癸未詔曰朕登庸二相倚遇惟均其所薦用之人不得偏私離間朋比害政謚孫傳曰忠定乙酉李綱始拜命置司福州是夜太平州軍士陸德據城叛囚守臣張錞殺當塗縣令鍾大猷戊子命呂頤浩都督江淮荆浙諸軍事庚寅劉豫徙居汴京是月王彥大破董先于馬嶺關復商州閏月癸巳高麗遣使入貢乙未知池州王進討陸德誅之丙申岳飛擊破曹成于賀州置都督府隨軍轉運司丁酉左朝奉郎孫覲坐前知臨安府贓汙貸死除名象州羈管罷後苑工作辛丑韓世清以狂悖伏誅丙午岳飛敗曹成于桂嶺縣成走連州遣統制張憲追擊破之又走彬州入邵州丁未賜福建宣撫司賞軍錢十萬緡聽朱勝非自便乙卯詔諸鎮撫使非奉朝旨毋擅出兵劉光世聞父喪去官特命起復己未詔自今明堂專祀昊天上帝以太宗配是月張浚命利夔制置使王庶

與知成都府王似兩易其職襄鄧副都統制李橫同副都統制李道合兵圍郢州霍明遁去五月辛酉以兵部尚書權邦彥簽書樞密院事以樞密將領趙琦所部兵爲忠銳第八將癸亥呂頤浩出師以神武後軍及忠銳兩將從行百官班送甲子以霍明權襄鄧隨郢州鎮撫使詔觀察使已上各薦可備將帥者二人丁卯罷兩浙轉運司回易庫已巳廢紹興府餘姚上虞縣湖田爲湖漑民田庚午詔脩建康行宮辛未選宗室子偁之子伯琮育于禁中丙子呂頤浩總師至常州前軍將趙巡壽兵叛于呂城鎮丁丑延壽犯

金壇縣殺知縣胡思忠頤浩稱疾不進戊寅海州賊王山犯漣水軍總領蘇復副統制劉靖會兵擊敗之庚辰臨安府火癸未置御前軍器所甲申親慮囚自是歲如之罷行在權官乙酉劉光世遣王德追趙延壽叛兵至建平縣悉誅之丙戌置脩政局命秦檜提舉詔侍從臺省寺監官監司守令條具省費裕國疆兵息民之策丁亥以中書門下省檢正官仇愈爲沿海制置使戊子手詔用建隆故事命百官日輪一人轉對兩浙轉運副使徐康國獻銷金屏障詔有司毀之奪康國二官蠲太平州被賊之家夏稅是月張浚

以參贊軍事劉子羽知興元府黜王庶復以王似知  
成都府韓世忠至洪州遣董收招曹成成聽命赴行  
在六月庚寅朔李宏引兵入潭州執馬友殺之甲午  
李綱領兵三千發福州戊戌詔孟庾韓世忠班師岳  
飛屯駐江州庚子以劉光世爲寧武寧國軍節度使  
韓世忠爲太尉移屯建康府辛丑以李橫爲襄郢鎮  
撫使李道鄧隨鎮撫使壬寅翟汝文罷孔彥舟叛降  
僞齊乙巳以權邦彥兼權叅知政事戊申仇愈兼制  
置福建路辛亥免臺諫官輪對甲寅召呂頤浩赴行  
在令參謀官傅崧卿權王管都督府事詔兩浙江淮

守臣令存撫東北流寓人乙卯韓世忠遣統制解元  
巨振入潭州執李宏以歸秋七月辛酉悉蠲福建諸  
州被兵之家田稅壬戌復置湖北提舉茶鹽司甲子  
罷福建提舉市舶司己巳起復翟琮爲河南府孟汝  
唐州鎮撫使甲戌罷淮東路提點刑獄司丙子馬友  
黨郝通率兵五萬歸宣撫司戊寅知廬州王亨復安  
豐壽春縣己卯呂頤浩入見庚辰韓世忠討劉忠駐  
兵于岳州之長樂渡大破之忠走淮西丁亥詔編次  
建炎以來譜牒八月壬辰以孟庾兼權同都督江淮  
荆浙諸軍事癸巳順昌縣賊余勝等作亂通判南劔

州王元鼎捕殺之甲午安定郡王令詒薨丙申詔郡守除罷赴闕皆得引對臨安府火以知江州劉紹先爲沿淮防遏使戊戌命朱勝非提舉醴泉觀兼侍讀日赴朝堂議事沿海州縣籍民海舶每歲一更守海道險要振福建饑民己亥停傳雱官英州羈管庚子詔孟庾韓世忠總大兵至建康進赴行在戊申給事中胡安國以論朱勝非罷宰執臺諫上疏留之皆不報江西統制傅樞討平南雄賊吳忠鄧慶劉軍一等己酉賜吳玠田甲寅秦檜罷給事中程瑀等坐輪朱勝非疑其黨檜並落職主宮觀玠出胃乙卯

戒輔臣修闕政罷脩建康行宮九月戊午朔落秦檜職己未罷脩政局辛酉以玠出大赦許中外臣民直言時政陝西諸叛將許令自新壬戌王倫自金國使還入見遣潘致堯等爲金國軍前通問使附茶藥金幣進兩宮甲子以直徽猷閣郭偉爲淮西巡撫使乙丑復以朱勝非爲尚書右僕射同中書門下平章事兼知樞密院事戊辰司空山賊李通出降以爲都督府親軍統領癸酉以右朝請大夫呂源爲浙東福建沿海制置使治定海縣知建昌軍朱芾擊石陂賊余照禽斬之甲戌玠沒丙子復以郭仲荀爲武泰軍節

度使詔墨敕有不當者許三省樞密院奏稟給事中  
中書舍人繳駁臺諫論列有司申審庚辰命福建提  
舉茶鹽官兼領市舶司辛巳以韓世忠爲江南東西  
路宣撫使他帥臣稱宣撫使者並罷壬午遣監察御  
史明橐等五人宣諭江浙湖廣福建諸路仍降詔諭  
官吏以遣使按察勸懲誅賞之意癸未新作行宮南  
門成甲申提轄權貨務張純浚立淮浙鹽法增其算  
總領四川財賦趙開初變四川鹽法盡權之乙酉太  
白晝見丙戌以知興元府王似爲川陝宣撫處置副  
使丁亥封右監門衛大將軍榮州防禦使令時爲安

定郡王是月韓世忠遣統制解元襲擊劉忠于蘄陽  
大破之忠奔劉豫冬十月戊子朔置牧馬監于饒州  
庚寅李勃伏誅丙申初置江浙荆湖廣南福建路都  
轉運使甲辰潘致堯至楚州通判州事劉晏劫其禮  
幣奔劉豫守臣柴春戰死戊申以知平江府趙鼎爲  
江東安撫大使丙辰禁温台二州民結集社會班度  
量權衡于諸路禁私造者是月顏孝恭招降石陂餘  
賊李寶等十一月辛酉陳顥陷汀州武平縣犯梅循  
二州乙丑初權明州鹵田鹽辛未議將撫師江上召  
侍從官條具利害甲戌命李綱劉洪道程昌寓解潛

會兵捕討胡寇楊太戊寅范汝爲餘黨范忠掠龍泉縣庚辰詔宣諭五使焚所至州縣建炎以前已蠲稅籍癸未臨安大火是月關師古敗僞齊兵于抹邦山馬友黨步掠詣李綱降綱入潭州其黨郝最降王進吳錫禽王浚湖南盜賊悉平十二月丁亥朔命神武前軍統領申世景等討捕范忠己丑僞稱榮德帝姬易氏伏誅范忠犯處州巨師古引兵入廬州執王亨送行在甲午李綱罷臨安府火丙申振陂火家罷浙東沿海制置司丁酉岳飛遣統領徐慶王貴討禽萍鄉賊高聚己亥以胡舜陟爲廬壽等州鎮撫使金人

侵熙秦關師古擊敗之庚子遣駕部員外郎李愿撫諭川陝江西兵馬副鈐轄張中彥坐縱暴不法斬于潭州辛丑程昌寓遣杜湛討楊欽等敗之殺三千餘人癸卯川陝宣撫司類試陝西發解進士得周謨等十三人以便宜賜進士出身甲辰罷張浚宣撫處置使仍知樞密院以知夔州盧法原爲川陝宣撫處置副使及王似同治司事己酉遣司封員外郎周隨亨同撫諭川陝庚戌孟庾自建康來朝辛亥金人犯商州守將邵隆退屯上津李橫敗僞齊兵復汝州甲寅命孟庾同都督江淮荆浙諸軍事詔都督府總治江



東西湖北浙西帥臣經畫屯田張浚承制以歸州隸夔州路是冬金人犯和尚原將士乏食自潰吳玠拔砦棄去虔賊謝達犯惠州

三年春正月丁巳朔帝在臨安率百官遙拜二帝不受朝賀江西將李宗諒誘戍兵叛寇筠州統領趙進擊郤之翟琮入西京禽偽齊留守孟邦雄命諸路憲臣兼提舉常平司庚申金人犯上津李橫破穎順軍偽齊知軍蘭和降壬戌金人犯金州洵陽縣以仇愈爲福建兩浙淮東路沿海制置使癸亥陳頤圍潮州不下引兵趨江西甲子李橫復穎昌府乙丑詔中外

刑官各務仁平臺憲檢察月具所平反以聞歲終考察殿最金人陷金州鎮撫使王彥焚積聚退保西鄉庚午罷行在宗正司命嗣濮王仲湜兼判大宗正事辛未震電雨雹造渾天儀李通爲其徒王全所殺壬申命西外宗正移司福州癸酉復祭大火以湯東野爲淮東安撫使乙亥以李橫爲襄陽府鄧隨郢州鎮撫使丁丑登萊山砦統制范溫率部兵泛海來歸庚辰詔春秋望祭諸陵張浚論奏王似不可爲副因引罪求罷不報癸未詔民復業者視墾田多寡定租額賦役乙酉減淮浙蠶鹽錢二月丁亥朔升桂州爲靜

江府已丑權邦彥薨浙東賊彭友犯龍泉縣辛卯李  
通餘黨劉德圍舒州吳玠遇金人于饒風關王彥自  
西鄉來會金人分兵攻關統制郭仲敗走丁酉饒風  
關破玠趣西縣彥奔達州四川大震張浚被罷職之  
命以諸軍方潰因秘不行復具奏審己亥金帥撒離  
曷入興元府經略使劉子羽焚其城走三泉縣吳玠  
退屯仙人關庚子以宗子伯琮爲和州防禦使賜名  
瑗尋改貴州辛丑蠲廣東諸州被賊民家稅壬寅鄭  
州兵馬鈐轄牛皐彭玘率兵與李橫會橫以便宜命  
皐爲茶唐州鎮撫使玘知汝州乙巳翟琮遣統制李吉

敗偽齊兵于伊陽又殲其將梁進之衆丁未王似始  
受宣撫副使之命戊申虔賊周十隆犯循梅汀州詔  
統制趙祥等合兵捕之庚戌以李橫爲神武左軍副  
統制京西招撫使改胡舜陟爲淮西安撫使辛亥以  
工部尚書席益參知政事翰林學士徐俯簽書樞密  
院事壬子王全犯廬州甲寅詔守臣至官半年具上  
民間利害或邊防五事李橫遣人奏穎昌之捷詔許  
橫便宜行事乙卯劉光世遣酈瓊等屯兵泗州爲李  
橫聲援是月張浚復以王庶爲參謀官往巴州措置  
時金兵深入至金牛鎮疑有伏由褒斜谷引兵還興

元吳玠劉子羽追擊其後殺獲甚衆三月己未詔岳  
飛捕虜賊壬戌申命統制巨師古部兵萬人屯揚州  
胡舜陟至廬州壬午全降甲子以趙鼎爲江西安撫大  
使李橫傳檄諸軍收復東京己巳金人遣兵援劉豫  
李橫敗走潁昌復陷壬午以韓世忠爲淮南東路宣  
撫使李綱遣兵擊降李宗諒詔戮于市夏四月丁亥  
朱勝非以毋喪去位僞齊知號州董震及其統制董  
先來歸以震權商號陝州鎮撫使己丑詔江東西湖  
比浙西募民佃荒田蠲三年租辛卯以劉光世爲檢  
校太傅江南東路宣撫使金人去興元壬辰徙都督

府于鎮江岳飛軍次虜州甲午僞齊知唐州胡安中  
來歸丙申僞齊李成攻陷號州董先牛臯奔襄陽己  
亥改謚昭慈獻烈皇后爲昭慈聖獻復舉五帝日月  
之祀庚子增文武小官奉辛丑荆南統制羅廣率兵  
至鼎州楊太衆益盛自號大聖天王立鍾相少子子  
義爲太子廣等不克討而還丁未岳飛遣統領張憲  
王貴擊彭友禽斬之劉忠爲部下王林所殺傳首行  
在戊申以浙西兵馬鈐轄史康民所部兵爲忠銳第  
九將己酉張浚奏王庶王似盧法原威望素輕乞命  
劉子羽吳玠並爲判官不報辛亥徐文叛奔僞齊五

月丙辰以翟琮為河南府孟汝鄭州鎮撫使董先為副使丁巳遣樞密計議官任直清撫諭襄陽商虢河南諸鎮己未命楊沂中招捕嚴州盜賊辛酉建睦親宅以董先為商虢陝州鎮撫使徵河南布衣王忠民為宣教郎至行在辭不受壬戌潘致堯還言金人欲重臣通使以取信遂寢出師之議乙丑罷諸州在任守臣所辟通判丁卯以韓肖胄等充金國軍前通問使安化蠻犯邊廣西經畧使許中發兵擊之戊辰楊沂中招降嚴州賊繆羅等捕斬其徒百人魔賊平庚午以岳州數被兵免今年稅役壬申詔守令尉佐境

內妖民聚集不能覺察致亂者並坐罪知建昌軍朱芾討南豐縣賊禽誅其魁黃琛乙亥以方與金國議和禁邊兵犯齊境丙子王彥復金州金兵棄均房去韓世忠請以大軍還鎮江己卯詔淮南統制解元成泗州餘屯江北周隨亨李愿宣押王似盧法原至閬州張浚始解使事時已論金牛之功以吳玠為利州路階成鳳州制置使劉子羽為寶文閣直學士王彥為保大軍承宣使僚屬將帥第賞有差庚辰浚及子羽王庶劉錫等赴行在詔李橫等收軍還鎮辛巳罷宣撫司便宜黜陟六月甲申朔統制巨師古坐違韓

世忠節制除名廣州編管丙戌復置六部架閣庫丁亥禁諸路招納淮北人及中原軍來歸者戊子復元祐宰相呂大防官職贈謚庚寅詔降川陝死罪囚釋流以下賞吳玠關師古將士壬辰張浚至綿州復奏王似不可任甲午命王玠率諸軍討楊太巳亥罷沿海制置司丁未置國子監及博士弟子員戊申以王林所部兵爲忠銳第十將巳酉岳飛自虔州班師辛亥發兵屯駐虔廣二州彈壓盜賊州各三千人是月金人圍方山原王似命吳玠發兵救之秋七月巳未復置博學宏詞科初許任子就試甲子以久旱償州

縣和市民物之直丁卯詔訪求累朝勲臣曹彬等三百人子孫以備錄用戊辰王玠以舟師發行在巳巳詔減膳禁屠弛工役罷苛姦命兩浙及諸路憲臣親按部錄囚辛未蠲紹興二年和市絕帛癸酉呂頤浩等以旱乞罷政帝賜詔曰與其去位曷若同寅協恭交修不逮思所以克厭天心者願浩等乃復視事乙亥朱勝非起復丙子泉州水溢壞城丁丑遣中使逆趣張浚于道是月四川霖雨地震八月巳丑詔岳飛赴行在留精兵萬人戌江州翟琮率兵突圍犇襄陽詔屯駐其地癸卯罷諸路輪禁軍闕額錢甲辰以雨

賜不時蘇湖地震求直言乙巳復置史館修撰直館  
檢討官命即宮兼領著作郎及佐郎戊申罷都轉運  
司已酉詔湖南丁米三分之一均取于民田其一取  
之丁口辛亥孟庾自軍中來朝九月戊午呂頤浩罷  
詔凡遇水旱災異監司郡守即具奏毋隱庚申岳飛  
自江州來朝川陝統領官吳勝敗偽齊兵于黃堆砦  
丙寅以趙鼎為江西安撫制置大使壬申詔中書舍  
人給事中凡制敕非軍期機速必先書押而後報行  
甲戌偽齊王彥先寇徐宿二州乙亥以劉光世為江東  
淮西宣撫使置司池州韓世忠為鎮江建康府淮南

東路宣撫使置司鎮江府王瓌為荆南府岳鄂潭鼎  
澧黃州漢陽軍制置使置司鄂州岳飛為江南西路  
舒蘄州制置使置司江州主管殿前司郭仲荀知明  
州兼沿海制置使神武中軍統制楊沂中兼權殿前  
司已卯吳勝克蓮花城冬十月癸未朱勝非上重修  
吏部七司敕令格式庚寅加吳玠檢校少保壬辰趣  
王瓌進兵詔寬私鹽重法甲午卻大理國入貢丁酉  
殘破州縣視戶口增損立守令考課法己亥禁州縣  
擅增置稅場偽齊李成陷鄧州辛丑南丹蠻莫公晟  
圍觀州焚寶積監殺知監陳烈壬寅偽齊兵逼襄陽

李橫以糧盡棄城奔荆南知隨州李道亦棄城去甲辰王瓌討湖賊戰于鼎口不利僞齊陷郢州守臣李簡棄城去申禁私役戰士丁未命三省除銓曹姦弊戊辰罷諸路類省試統制石世達及杜湛合兵大破湖賊黃誠于龍陽洲庚戌復置宗正少卿及寺監諸丞是月王彥先引兵至北壽春將渡淮劉光世駐軍建康扼馬家渡又遣鄺瓊駐無爲軍爲廬濠聲援賊乃還十一月己未以右文殿修撰王倫爲都督府參議官癸亥詔監司帥守察内外宗子病民害政者以聞崔增吳全遇湖賊于陽武口歿之甲子韓省胃等

使還乙丑禁沿淮諸砦兵擅侵齊境庚午臨安府火甲戌禁掠賣生口入蠻夷嶮峒及以銅錢出中國乙亥復元祐十科舉士法丁丑命賓橫宜觀四州市戰馬戊寅王燮自鼎州引兵還鄂留統領王渥等四軍聽程昌寓節制己卯蠲南劔州所有民間獻納錢十萬緡省淮南州縣文武官十二月辛巳朔降勅書撫諭吳玠及川陝將士乙酉臨安府火戊子又火朱勝非以屢火求罷不允丙申王似承制廢通遠軍己酉金國元帥府遣李永壽王翊來見是歲海寇黎盛犯潮州焚民居毀城去

四年春正月辛亥朔帝在臨安率百官遙拜二帝乙卯增淮浙路鹽鈔貼納錢遣章誼等爲金國通問使已未程昌寓遣杜湛王渥攻楊太皮真砦破之己巳詔諭王似盧法原吳玠使之協和金人犯宕昌臨江砦及花石峽關師古遣統領劉戩分兵拒却之庚午詔諸路將帥毋以兩國通使輒弛邊備淮南州郡津渡尤慎譏察甲戌罷州縣新置弓手乙亥蠲循梅潮惠四州被兵家租賦丙子申敕三省樞密院除官並遵舊制毋相侵紊除拜罷免皆明示黜陟之由戊寅金人犯神砦沿北嶺至大散關臨安府火己卯韓

肖胄罷一月壬午詔賊罪至死者仍籍其柴癸未作建康府行宮席益罷乙酉以徐俯兼參知政事丙戌禁川陝諸將招納北軍湖北軍賊檀成犯長陽縣解潛遣統領胡勉捕斬之羣盜田政自襄陽犯陝州己丑解潛遣統制王恪擊政斬之庚寅金人犯兩當縣乙未詔孟庾赴行在己亥詔三衙管軍及將帥觀察使以上舉忠勇智略可自代者一人辛丑金人犯仙人關癸卯詔權以射殿爲景靈宮四時設位朝獻丙午張浚入見三月辛亥朔吳玠率楊政吳璘田晟王喜諸將與兀朮戰于仙人關大敗之兀朮遁去戊午



雨雹以趙鼎參知政事壬戌孟庾至行在罷都督府  
以其兵屬張浚乙丑張浚以資政殿大學士罷尋落  
職奉祠福州居住己巳蠲淮南州縣民租一年辛未  
日有青赤黃氣編次建炎以來詔旨頒諸路癸酉蠲  
興元府洋州被兵家稅役二年丙子以王似爲資政  
殿學士川陝宣撫使盧法原爲端明殿學士與吳玠  
並充副使關師古爲熙河蘭廓路安撫制置使夏四  
月庚辰朔命趙開再任總領四川財賦詔諭川陝官  
吏兵民以張浚失措當示遠竄猶嘉其所用吳玠等  
能禦大敵許國一心止從薄責仍令宣撫司講求諮

訪凡擾民弗衆之事速釐革之癸未劉子羽白州安  
置乙酉詔明堂用皇祐典禮兼祀天皇帝神州地  
祇以下諸神丙戌吳玠敗金兵復鳳秦隴州詔特旨  
處死情法不相當者許大理奏審蠲淮南州軍上拱  
錢一年庚寅置等生牧馬監于臨安府甲午罷廣西  
提舉茶鹽司關師右叛以洮岷二州降僞齊吳玠併  
將師古今乙未詔諸路歲上戶口丁酉罷諸州回易  
庫庚子命劉光世遣兵巡邊辛丑保靜州夷人入貢  
丙午徐俯罷是月王似承制廢符陽軍知壽春府羅  
興叛降僞齊五月庚戌朔以岳飛兼黃復二州漢陽

軍德安府制置使癸丑以范冲爲宗正少卿兼直史館仲脩神宗哲宗正史實錄甲寅詔淮南師臣兼營田使守令以下兼管營田岳飛復郢州斬僞齊守荆超甲子以孟庾兼權樞密院事乙丑賜李橫軍絹萬匹丙寅李成棄襄陽去岳飛復取之金人攻金州鎮撫使王彥遣統制許青等與戰于漢陰敗之罷諸縣武尉壬申裁省三省樞密細務責六曹長貳專決癸酉以國史日曆所爲史館僞齊收李成餘衆益兵駐新野岳飛與別將王單夾擊復大敗之乙亥王彥數敗金兵于洵陽縣丙子復選宗室子彥之子伯孜育

于禁中六月壬申復命川陝類試乙未太白晝見經天戊戌詔神武軍神武副軍統制統領官並隸樞密院庚子以霖雨罷不急之役壬寅詔三省樞密院凡奉于請墨勅許執奏不行置史館校勘官作明堂行禮殿于教場甲辰禁諸軍疆刺平人爲兵已刺者皆釋之吳玠乞宮觀不允是月熒惑犯南斗岳飛將牛皇復隨州執僞齊守王嵩磔之秋七月戊申朔曲赦虔州以吏部尚書胡從年簽書樞密院事庚戌以湖南安撫席益爲安撫制置大使建康軍軍卒脩達等作亂殺等臣劉滂江西制置使胡世將遣叅謀侯慤

統制丘贊討之壬子命吳玠通信夏國癸丑湖賊楊欽等破社木砦官軍敗卻小將許簽戰歿丙辰賞仙人關之功以吳玠爲檢校少師奉寧保靜軍節度使吳璘楊政以下論賞有差丁巳命左右司歲考郎官功過治狀以爲賞罰庚申復曲端趙哲官壬戌岳飛遣統制王貴張憲繫敗李成及金兵于鄧州之西復鄧州禽其將高仲丙寅侯慤引兵入建昌軍執修達等十三人斬之罷建州臘茶綱詔江東安撫司招水軍千五百人已巳湖賊萬餘人詣鼎澧二州降劉光世來朝庚午王貴張憲破金齊兵復唐州及信陽軍

襄漢悉平辛未章誼孫近使還入見粘罕致書約淮南毋得屯兵八月庚辰以趙鼎知樞密院事充川陝宣撫處置使湖賊夏城策犯杖江縣解潛遣將蔣定舟與戰敗之辛巳吳玠遣統領姚仲攻隴城縣克之壬午王玠以討賊無功降光州觀察使戊子改命趙鼎都督川陝荆襄諸軍事乙未遣魏良臣等充金國通問使丙申毀王安石舒王告巳亥周十隆出降爲官軍所掠復遁去犯汀循州壬寅王似罷以岳飛爲清遠軍節度使湖北荆襄潭州制置使代王玠討湖賊癸卯以襄陽府隨郢唐鄧州信陽軍六郡爲襄陽

府路九月戊申減淮浙路鹽鈔所增貼納錢壬子夏  
誠遣將李全功犯公安軍解潛遣統制林閏等擊斬  
之安定郡王令時薨辛酉舍祭天地于明堂大赦蠲  
襄陽等六郡三年租稅庚午朱勝非罷金齊合兵自  
淮陽分道來犯壬申渡淮楚州守臣樊叙棄城去韓  
世忠自承州退保鎮江府癸酉以趙鼎爲尚書右僕  
射同中書門下平章事兼知樞密院事吏部尚書沈  
與求參知政事冬十月丙子朔與趙鼎定策親征人  
張浚以軍援淮東劉光世移軍建康車駕擇日進發  
丁丑以孟庾爲行官留守留統制王進一軍及神武

中軍五百人隸之百司不預軍旅之務者聽從便避  
兵已卯韓世忠自鎮江率兵復如揚州金人犯滁州  
以張浚爲浙西江東宣撫使金人圍亳州席益遣統  
制吳錫率兵討穽賊楊再興大破之壬午僞齊兵犯  
安豐縣癸未復以張浚爲資政殿學士提舉萬壽觀  
兼侍讀甲申復以王瓌爲建武軍承宣使江西沿江  
制置使丙戌命胡松年詣江上會諸將議進兵戊子  
韓世忠邀擊金人于大儀鎮敗之又遣將董收敗之  
于天長縣鴉口橋己丑金人攻承州韓世忠遣將成  
閔解元合兵擊于北門敗之金人圍濠州甲午遣秘

晉正字楊晨持詔撫諭四川遣侍御史魏竑監察御史田如鰲詣劉光世張浚軍中計事光世始移軍太平州丙申命後宮自温州泛海如泉州金人陷濠州守臣寇宏棄城走丁酉詔州縣團教弓手土兵戊戌帝御舟發臨安劉錫楊沂中以禁兵扈從己亥韓世忠捷奏至命收瘞戰死將士仍令胡松年致祭庚子張浚率兵發鎮江如建康壬寅帝次平江加贈陳東歐陽澈祕閣修撰官其子孫二人各賜田十頃且追咎汪伯彥落觀文殿學士黃潛善更不追復命韓世忠楊沂中分兵控扼沿海要地癸卯焚決淮東閘堰

賜扈從諸軍錢乙巳仇愈遣將孫暉擊金人于壽春敗之復霍丘安豐二縣是月借江浙坊場錢一界以備軍費十一月戊申太白晝見庚戌賞承州水砦首領徐康等要擊金兵之功轉官有差仍蠲承楚泰州水砦民兵賦役十年置沿江烽火放浙東諸郡防城丁夫壬子始下詔聲劉豫逆罪諭親討之旨以厲六師吳玠遣統制楊從儀等率兵敗金人于臘家城癸丑玠乞納節贖劉子羽罪遂聽子羽自便金人入光州甲寅僞齊知光州許約破石額山砦遂據之乙卯韓世忠遣兵夜劫金人營于承州破之金人犯六合

縣丙辰掠全椒縣三城湖丁巳戒諸路大小臣僚借  
貸催科縱吏姦擾民及務絕盜賊之伺隙者命董敦  
趙康直總領淮東水砦戊午以胡松年兼權參知政  
事金人陷滁州劉光世移軍建康韓世忠移軍鎮江  
張浚移軍常州己未復命張浚知樞密院事以其盡  
忠竭節詔諭中外庚申宴犒守江將士癸亥劉光世  
遣統制王德擊金人于滁州之桑根敗之揭黃勝招  
諭湖賊甲子命滁和諸州移治保聚乙丑金人犯滁  
口巳巳劉光世遣統制王師晟等率兵夜入南壽春  
府襲金人敗之執僞齊知府王靖廣賊區稠圍韶州

樂昌縣鈐轄韓京遣兵擊斬之詔張浚視師江上十  
二月乙亥朔魏良臣王繪還自泗州軍前入見戊寅  
命都督府右軍統制李貴部兵屯扼福山鎮辛巳命  
中軍統制王進屯兵泰州防拓通泰壬午以樞密都  
承旨馬擴爲江西沿江制置副使丙戌吳倫遣兵攻  
臘家城破之丁亥聽兩淮避兵民耕種所在間田壬  
辰金齊兵逼廬州仇愈嬰城固守岳飛所遣統制徐  
慶牛皐援兵適至敗走之劉光世亦遣統制靳賽戰  
于慎縣張浚遣統制張宗顏擊敗金人于六合詔江  
浙荆湖十四郡各募水軍五百人名橫江軍兩浙十

郡沿江海州縣招捕巡檢土軍甲午程昌寓遣杜湛  
彭筠合擊楊欽破之己亥以來年正旦日食下詔脩  
闕政求直言庚子金人退師辛丑詔葬祭浙西江東  
二軍之死事者壬寅省淮南轉運司遣胡松年往常  
熟縣江陰軍沿江計議軍事癸卯金人去滁州

本紀卷第二十七

